

## Inatsisissatut siunnersuummut oqaaseqaatit

**Oqaaseqaatit nalinginnaasut**1. Inatsisissatut siunnersuutip tunuliaqutaa

Ineriartorneq ilutigalugu akileraartarnermi malittarisassat nalimmassarneqarnerannut inatsisissatut siunnersuut ilaavoq.

*Suliartoqquneqarsinnaanermut atatillugu akileraarutaasussaannngitsunik biileqartitaaneq*

Ukiaanerani 2009-mi Inatsisartut ataatsimiinneranni Akileraartarnermut Akitsuusiinermullu Ataatsimiititaliap Naalakkersuisut misissueqquai suliffinni suliartoqquneqarsinnaanermut atatillugu akileraarutaasussaannngitsunik biileqartitaanermi malittarisassat allannngortinneqarsinnaanersut, taamaaliornikkut pinngitsoortinneqarsinnaammatt suliffeqarfii akileraanngitsoornissaq anguniarlugu suliartoqquneqarsinnaanermut aaqqissukkamik pilersaarusiortarnerit. Inatsisissatut siunnersuummi, sulisilluni suliartoqquneqarsinnaanermut atatillugu suliffiup biiliinik, biilinillu immikkuullarissunik ingerlatsisartut pitsaanerusumik aaqqissuussivigineqarnissaat anguniarneqarpoq.

*Nalikilliliisarnermi malittarisassanik erseqqarissaaneq*

Aningaasarsianit akileraarutit pillugit inatsit 2006-imi akuersissutigineqarnera ilutigalugu erseqqissarneqarpoq § 23-mi nalikilliliisinnaanermut aalajangersagaq aammattaaq killilimmik akileraartussaataasunut atuutsinneqassasoq. Inatsimmik taamatut § 22-missaq erseqqarissaanermi nunami allamiut selskabiutaanut killilimmik akileraartussaataasunut malittarisassaliortoqanngilaq. Akerlianilli § 22-mut oqaaseqaatini takuneqarsinnaavoq § 1, imm. 1, nr. 3-miit 14-imut pineqartunut aalajangersakkami pineqartut. Pasinarmat suliffeqarfii killilimmik akileraartussaataasut nalikilliliinermi aalajangersakkat malitassat uniorlugit killeqanngitsumik nalikilliliisinnaanngortut imaluunniit nalikilliliisnaatitaannginnertik tunngavigalugu nalikilliliinerni inatsimmi § 22-mi malittarisassat tunngavigalugit suliffeqarfii nalikilliliisartut. Tamatumuunakkut aningaasarsianit akileraarutit pillugit inatsimmi § 22-mi oqaatsit allassimasut pingaartinneqarput, tassalu inatsimmi § 23-mi aalajangersakkat assignagit tamakkiisumik killilimmilluunniit akileraartussaataasunut pissutsit eqqartorneqarmata.

Aatsitassarsiornermi suliassat annertusiartornerat tamatumunngalu atatillugu selskabit killilimmik akileraartussaataasut amerliartornissaat eqqarsaatigalugit pissusissamisoorinarpoq qularnaatsumik inatsisitigut inissisimanissaq pillugu § 22-p erseqqarissarnerunissaa.

*Akuersissutinik nalikilliliinerit*

Aatsitassanik misissueqqaarnissani, ujarlernissani piiiaanissanilu akuersissutinik selskabit akulerussimasut akornini akuttunngitsunik niueqatigiittoqartarpoq. Akileraartarnermi

nalikilliliinerit il.il. pillugit nalunaarut nr. 30, 1. december 2006-imeersaq malillugu qularnarpoq akuersissutinik timitaqanngitsunik pisinerni akileraarnissami nalikilliliisoqarsinnaanera. Pissusissamisoorinarluinnarpoq akuersissutinik pigisaqalernissani nalikilliliinissat inatsisiliuunneqarnissaat, kulbrintisionermi ukiut 10-t aatsitassarsionermilu ukiut 4-t ingerlanerini ukiumoortumik atsikkutigissaartunik nalikilliliisoqartassalluni.

### *Suliffeqarfiit killilimmik akileraartussaataasut allanngortiteneri*

Aatsitassarsioneq pillugu inatsimmi nutaanngitsumi nutaamilu aatsitassanik piiaanissani, aktieselskabit kisimik annikitsuinnarmik aatsitassanik atuisartut eqqaassanngikkaanni, akuersissummik tunineqarsinnaanerannik aalajangersagaqarpoq. Piumasarineqarpoq aktieselskabit taamaattut Kalaallit Nunaanni angerlarsimaffeqarnissaat.

Aatsitassat pillugit inatsimmi piumasaqaataanngilaq suliffeqarfiit aatsitassanik misissueqqaarnissanut imaluunniit ujarlernissanut akuersissutitaarniarunik Kalaallit Nunaanni najugaqartariaqarnerannik. Manna tikillugu suliffeqarfiit aatsitassanik misissueqqaarnermut ujarlernissanullu akuersissummik tunineqartut amerlanersaat Kalaallit Nunaanni najugaqartuunngillat.

UKA 2009-mi aningaasarsianit akileraarutit pillugit inatsimmi § 2-mi nutaatut ilassutigineqarpoq imm. 2 (UKA 2009/122). Aalajangersakkani naqissuserneqarpoq aatsitassanik misissueqqaarnermut, ujarlernerimut piiaanermullu akuersissuteqartut Kalaallit Nunaanni akileraartussaataasasut. Ikaarsaariarnermi malittarisassatut ilanngunneqarpoq inatsit 1. januar 2010 nallertinnagu suliffeqarfiit aatsitassanik misissueqqaarnerminni, ujarlernerminni piiaanerminnilu aningaasartuutitik akilersimagunikkik, piiaaffinni ingerlareersuni malittarisassat assigalugit aningaasarsiatik akileraaruteqaataasussat naatsorsorsinnaagaat. Aningaasarsianit akileraarutit pillugit inatsimmi § 30 malillugu amigartoorutit naatsorsorneqartut ikiunut tulliuuttunut nuuttarsinnaavaat, aningaasarsianillu akileraaruteqaataasussanit naatsorsorneqartunit ilanngaatisarsinnaallugit.

Suliffeqarfiit aatsitassanik misissueqqaarnermik ujarlernernillu suliallit Kalaallit Nunaanni angerlarsimaffeqartutut nalunaarsorsimasut, selskabinngortinnginnerini akileraarutitigut naatsorsuutiminni ajunaaruteqangaatsiarlutik nalunaarsuisartut pinngitsoortinniarlugit inatsisip nalimmassaqinnissaa pisariaqalersimavoq.

Naalackersuisut isumaqarput maannakkut Kalaallit Nunaanni aningaasat pisariaqartinneqaleruttorfianni pingaartoq suliffeqarfiit nunanit allaneersut aatsitassanik misissueqqaarnermi ujarlernernilu amigartooruteqarlutik ingerlanerminnik nalunaaruteqartut akileraartarnikkut malittarisassat sukaternerisigut nangaalersinnginnissaat. Siunnersuutigineqarpoq suliffeqarfiit Kalaallit Nunaanni angerlarsimaffeqartut, taamaalilluni nunatsinni tamakkiisumik akileraartartut suliffeqarfimmik aaqqissuussaanerata allanngortinnerani tunineraniluunniit suliffeqarfittut killilimmik akileraartussaataasutut, aningaasarsianit akileraarutit pillugit inatsimmi § 2, imm. 2 malillugu akileraartalernissaat siunnersuutigineqarpoq.

### *Akuersissutit ilaannik tunisinerit ("farm out")*

Aatsitassanik misissueqqaarnissani ujarlernissanilu akuersissutinik tunniussinermi akuersissummik pigisaqalersup anguniagassat ilaat aalajangersimasut piffissami aalajangersimasumi naammassereersimasassaattut piumasaqaataasarput. Anguniagassat ilagisinnaavaat ulloq aalajangersimasooq nallertinnagu qillerineq/-nerit aalajangersumik

amerlassusillit qillereersimassagai. Anguniagassat aalajangersimasut akuersissuteqalersumut aningaasartuutaangaatsiartarput. Akuersissummik pigisaqalersup nammineq aningaasaatiminik akilersinnaangikkunigit aningaaserivimmit, aningaasaliiffinnilluunniit atorniartariaqartarpoq, imaluunniit akuersissutigilikani suleqatissarsiornermigut akuersissutini tunisinnaasarlugu, tassa taamaaliornermigut ilaatigut aningaasaqarnerulertarlutik ilaatigullu suleqateqarnermikkut aningaasartuutininik avitseqatissarsisarlutik. Selskabit amerlasuut ujarlernissaminni suliffeqarfinnik annerusunik aningaasaqarnerusunillu suleqatissarsiortariaqartarput.

Kalaallit Nunaanni aallaaviugajuppoq akuersissutininik ilaannaannilluunniit piffissami tunisinermini akileraartussaataalerneq. Apeqqutaanngilarli qaqugu pisisup tamanna akilissaneraa. Imaappoq tunisisup tunisinermini iluanaarutigisinnaasai ukiumi akileraarfiusussami iluanaarutini akileraarutigissagai, taamaalilluni tunisisup ukiumi tassani iluanaaruteqarsimannginninni ujarlernerni allani iluanaarutigisinnaasimanngippagu. Maannamut akileraaruseeriaatsip selskabit Kalaallit Nunaanni aatsitassanik ujarlernissanut tunuarsimaartilersittarpaat.

Nalinginnaasumik oqaatigisariaqarpoq misissueqqaarnissat ujarlernissat tunisinissallu Kalaallit Nunaanni inuiaqatigiinnut iluaqutaasinnaanngorlugit aaqquussisoqartariaqarnera.

”Farm out” suliffissuarnit uuliamik nioqquutissiorutit akuersissutillit piginneqataassutiminnik suliffeqarfimmut allamut tunisinerinut taaguutaavoq. Assersuutigalgu suliffeqarfiup aningaasartuutigisimasani utertissavai, isumaqatigiissutaareersullu malillugit aatsitassanik ujarlernerni annertunerusumik aningaasaliisarlu. Piginneqataalernermini akiliutaagajupput pisisup aatsitassanik ujarlernerni aningaasartuutit akilernerisigut, tunisisup piginneqataassutsimigut sinneruttunit akiligassaralui.

Siunnersuummi pineqarpoq pisisup piginneqataassutaanit annertunerusumik pisisoq aatsitassanik ujarlernerni aningaasartuutininik akiliisarnissaa. Uuliasiornerni aatsitassarsiornernilu siunnersuut maanna atorneqartussaavoq. Aningaasalersueriaatsip taamaattut aatsitassarsiorfeqatigiinnit taaneqartarpoq ”earn out”. Inatsisissatulli siunnersuummi oqariaaseq ”farm out” uuliasiornissami aatsitassanillu piiaanissani ataatsimoorussatut atorneqarpoq.

Siunnersuummi siunertaavoq akuersissummik tunisinerup nalaani akileraartarnermini isertitat ajunaarutillu piffissami ataatsimi nalunaarsornissaat, akiliisussarlu tassaassasoq siunissami aatsitassanik ujarlernissami akuersissummik pisisoq, tunisisup piginneqataassutsimi sinnerinik akiligassaraluinik. Allanguineq pingaartumik suliffeqarfimmut minnerusunut Kalaallit Nunaanni aatsitassanik misissuisunut iluaqutaassaaq.

#### *Allanguinissat kingunerisinnaasai*

Akileraarnermini Aqutsisoqarfimmit arajutsineqanngilaq aningaasarsianit akileraarutit pillugit inatsimmi § 2, imm. 1, nr. 17 aamma § 2, imm. 5, oqaaseqatigiit aappaat tunngavigalugit killilimmik akileraartussaataasut inummut ilanngateqartittariaqannginneri, taakkunani aalajangersakkat inatsimmi § 66, imm. 1-imi aalajangersakkami ilanngunneqarsimanngimmata. Tamanna siunertaanngilaq, inuimmi killilimmik akileraartussaataasut akileraaruseeriaatsimik allaanerusunik killilimmik akileraartussaataasunit allaanerusunik aaqquussivigineqartussaanngimmata.

#### *Avataanit suliaartortut akileraartarnikkut inissisimanissaat*

Siunnersuutigineqarpoq avataannit suliaartortut illoqarfiit nunaqarfiillu avataanni sulinerminni akissarsiaasa akileraarutitaat landskarsimut nakkartinneqartassasut. Qaammatini kingullerni arfinilinni Kalaallit Nunaanni sulereersimasut, kommuninullu akileraartarsimasut siunnersuummi ilanngunneqanngillat, pisarnerli malillugu akileraarutaat kommuninut landskarsimullu nakkartinneqartassallutik. Suliap naammassinerani, siunertamullu atulernerani sulisut tamarmik akileraarutaat tamarmik, apeqqutaatinnagu nunatsinneersuunerat avataaneersuunersulluunniit, malittarisassat malillugit agguarneqassapput.

Suliffeqarfimmi sulisoq Inatsisartut aatsitassanik misissueqqaarnernik, ujarlernernik piiaanissamullu inatsisaat malillugu akuersissuteqartumik, imaluunniit Inatsisartut inatsisaat malillugit aatsitassanik avammut tuniniaasinnaanermut, qaammatillu arfinillit kingulliit nunatsinni kommunimut akileraartarsimanngitsoq kommunimut najugaqarfigisaminut akileraartassasut siunnersuutigineqarpoq. Aammattaaq uani sulisut, qaammatit arfinillit sioqqullugu sulilinnginnerminni allami sulisimasut kommunit arlaannut akileraarutigisimasaat, malittarisassat malillugit kommunit landskarsillu aveqatigiissavaat.

Allannguinerit suliffeqarfiit avataaneersut Kalaallit Nunaanni ukiuni makkunani aatsitassarsiornissanut aningaasaliinerunerisa kingunerissavaa akileraarutigut isertitat amerlineri. Siunnersuutit kommunit akileraarutigut isertitassaannut killilimmik sunnuteqassapput, taamaattorli Kommune Kujallip Angel Mining Gold, Qeqqatalu Kommuniata Seqi Olivin ukiuni tullerni annikinnerusumik isertitaqaatigissavaat.

Malittarisassat atuuttut malillugit inuit akileraarutaasa 26 procentii landskarsimut, 74 procentiilu kommuninut pisassarititaapput. Taamatut nammaqatigiilluni suliasanik agguataarineq Namminersorlutik Oqartussat kommunillu akunnerminni ikorfartoqatigiinnerannik ersersitsivoq, Namminersorlutillu Oqartussat naalagaaffimmit annertungaatsiartumik ukiumoortumik tapiissutisarnera ersersinneqarpoq.

Ukiuni tulliuttuni qularnanngilaq suliffeqarfissuit nunanit allaneersut Kalaallit Nunaanni aningaasaliinissaat, assersuutigalugu Alcoamik pilersaarut, piffissami aalajangersimasumi ulapileruttorfimmi sulisussat avataaneersut sanaartornerni pinngitsoorneqarsinnaanngillat. Maannakkorpiarlu Kalaallit Nunaanni uuliamik aatsitassanillu ujarlernerit soqutigineqaqaat. Uuliamik aatsitassanillu ujarlernissat, qalluinissanilu sulisussat avataaneersut immikkut ilinniagallit sulisorisariaqassapput.

Avataanit suliaartortut nunatsinniinnerminni pisortanit killilimmik ikiorneqarnissaat naatsorsuutigisariaqarpoq, atorfissaqartitsilersinnaanerallu tassaassaaq Peqqinnissaqarfik; tassalu landskarsimit akilernerqartussa. Alcoallu sanaartornerani illuliortiternerni, atuarfiit, suliffeqarfissamut aqqusinniornermi suliasanik nammaqatigiinnermi agguataarinermilu aningaasartuutit landskarsimit akilernerqartussaapput, soorluli pilersaarusiornermi aningaasartuutit akilersimagai. Landskarsip maannakkut artukkerneqarsimanerani pisariaqarpoq aningaasartuutit tamakku akilernissaannut periarfissarsiornissaq.

Suliffeqarfiit nunanit allaneersut ilaannaaluunniit nunatsinni aningaasaliippata nunatsinni tamarmi allanngornermik kinguneqassaaq. Pisariaqalersinnaavoq inuusutissarsiornikkut, suliffissaqarnikkut, ilinniartitaanikkut ineqarnermullu politikkip allanngortinneqarnissaat. Nuttarsinnaanermuttaaq politikki kallarneqarsinnaavoq. Allanngornerni tamakkunani annertunerpaamik landskarsi aningaasaliisussaavoq, sipaarniartoqangaatsiassanngippallu akileraarutigut isertitassat Namminersorlutik Oqartussat ujartortariaqarpaat. Landskarsip aningaasartuutissaanik avataanit suliaartortut akileraarutaannit matussuserneqarsinnaapput. Taamaaliornikkut suliaartortut ataasiakkaat tamakkiisumik akileraarusernerisigut periarfissaalissaq, soorlu tamanna ataani allassimasuni atuarneqarsinnaasoq.

### *Tamakkiisumik akileraaruteqarneq*

Siunnersuutigineqarpoq nunap ilaani aatsitassarsiorfiusuni illoqarfiit nunaqarfiillu avataanni sanaartormermik suliaqartut nunami allamiut tamakkiisumik akileraaruteqartitaanissaat. Sulisunut taakkununga akileraartarnermi sullissineq ajornannginnerulersinniarlugu tamakkiisumik akileraartarneq atulersinniarneqarpoq.

Pisariillisaaneq aallaaveqarpoq sulisoq isertitaminit tamakkiisunit 35 procentinik akilerartarnissaa, sulisullu namminneq akissarsiami naatsorsornerisa inernerinik nalunaaruteqartassanngillat. Akileraarutaasut naatsorsornerini inuup ilanngaataa ilanngaatilluunniit allat naatsorsuutigineqassanngillat.

Siunnersuummi sillimaffigineqareerpoq avataanit suliaartortut aggerfiisa oqartussaasuisa Kalaallillu Nunaanni oqartussat akornini marloriaammik akileraartussaaneq pinngitsoorniarlugu isumaqatigiissuteqartoqannginnera, naatsorsuutigisariaqarlunilu nunat aggerfiisa akileraartarnermut aqqissuussineri kalaallit akileraariaasiannit allaanerusumik aqqissuunneqarsimanissaat. Taamaattumik avataanit suliaartortut nalinginnaasumik akileraartarnermi aqqissuussineq tunngavigalugu akileraartalernertik ippinnartoqartissinnaavaat. Malittarisassat maannamut atuuttut tunngavigalugit akileraarusersuisoqassappat naatsorsuutigisariaqassaaq paasisitsiniaanernut, allaffissornikkut, akileraarutinillu akiliisitsiniartarnermut Akileraaruseriffik immikkut suliakkersorneqassasoq. Taamaattumik tamakkiisumik akileraartitsisarneq akileraartussanut Akileraaruseriffimmullu pisariinnerpaassaaq.

### 2. Inatsisissatut siunnersuutip imarisaa

#### *Suliartoqquneqarsinnaanermut atatillugu akileraarutaasussaannngitsunik biileqartitaaneq*

Inassutigineqarpoq sulisut sulisitsisuminnit allaganngorlugu uppersaataatimmik pigartuunerminni suliartoqquneqarsinnaanermut atatillugu biilnik immikkut siunertatut atugassanik biileqartinneqarnertik akileraarutigissanngikkaat.

Aalajangersakkani § 19, imm. 8-p saniatigut sulisoq suliartoqquneqarsinnaanermut namminerisamik biilit angerlarsimaffiup suliffiullu akornanni avataatigut allanut atorsinnaavai, assersuutigalugu pisiniarfiliartilluni, meeqqaminik meeqqerivimmukaassitilluni aallertillunilu, ilaqtaminut ikinngutiminullu pulaartilluni il.il.

Siunnersuutigineqartut aalajangersakkani § 19, imm. 8-mi allaqqareersut malillugit qaqugukkut suliartoqquneqarsinnaanertut nalilernerqarsinnaavoq. Aggersarneqarsinnaatitaalluni kalerriteriataarnissamini inuinnartut inuunermini periarfissakinnerutitaassaaq, aammalu akisussaassuseqarfigilluinnartussaallugu. Aggersarneqarsinnaanermut atatillugu akileraaruteqanngitsumik biileqartitaanissaq sulisitsisup allaganngorlugu sulisuminut uppersaanissaq piumasaqaataalluinnarpoq.

#### *Nalikilliliinissanut malittarisassat erseqqissarneri*

Siunnersuutigineqarpoq selskabit Kalaallit Nunaanni angerlarsimaffeqartut tamakkiisumillu akileraartussaataasut, selskabillu killilimmik Kalaallit Nunaannut akileraartussaataasut aningaasarsianit akileraarutit pillugit inatsimmi § 22 malillugu akileraartinneqartarnissaat. Maannamut inatsisitigut inissisimanerup ersernerlunnera erseqqissaanikkut peerniarneqarpoq.

#### *Akuersissutinik pigisallit nalikilliliisinnaanerat*

Siunnersuutip kingunerissavaa aatsitassanik misissueqqaarnerni, ujarlernerni atuinermilu akuersissutinik pisinermi nalikilliliisarnerit malittarisassat nutaat aningaasarsianit akileraarutit pillugit inatsimmi § 22 b malillugu pialissasut.

Nalikilliliisarnermi malittarisassat tunngavigalugit ingerlatat nalinginnaasut, immikkuullaarissullu nalingisa nalilersorneqartalernissaat akuersissutit ataasiakkaat, akuersissutilluunniit ilaannaasa tuninerini immikkoortillugit nalilersuisoqartalernissaat anguniarneqarpoq.

Ukiumi tassani akuersissummik tunisinermi pisisup nalikillilersinnaavaa, tunisorli tunisani pillugu nalikillilerisinnaangilaq.

Siunertarinearpoq akuersissutinik nalikillilerinerni uuliamut tunngassuteqartunik akuersissutit ukiuni qulini attikkutsigiissaartumik nalikillilerneqartarnissaat, akuersissutillu aatsitassanut tunngassuteqartut ukiuni sisamat ingerlanerini nalikillilerneqartarnissaat pituttorneqassasut. Siunnersuummi ersersinniarneqarpoq suliffeqarfiit aatsitassarsiortut killeqanngitsumik ajunaarutigisaminnik nalunaaruteqarsinnaanerit, taamaalillutillu pinngitsooratik nalikilliliinissaminni ajunaaruteqartussaananik. Uulia gassilu eqqarsaatigalugit nalinginnaasuvoq piiaaneq ukiumi siullermi annertunerpaasarnera, kingornalu annikilliartharluni.

Aatsitassanik misissueqqaarnermi, ujarlernermi atuinermilu iluanaarutit ajunaarutillu pigisanik nalikilliliinermisulli iluanaarutinik ajunaarutinillu naatsorsuisoqartassaaq.

*Suliffeqarfiit killilimmik akileraartussaataasut allanngortiterneri*

Siunnersuutigineqarpoq aningaasarsianit akileraarutit pillugit inatsimmi § 2, imm. 2-mi taaneqartunik suliffeqarfiit killilimmik akileraartussaataasunik Kalaallit Nunaanni angerlarsimaffeqartunik aktie- imaluunniit anpartsselskabinngortitsinermut atatillugu allanngortinnerini tunineriniluunniit akileraarutitigut inissisimaneranut ingerlatitseqqisoqarsinnaasoq.

Ingerlatitseqqinnermi piunasaqaataavoq aningaasarsianit akileraarutit pillugit inatsit aammalu akileraaruserinermik ingerlatsineq pillugu Inatsisartut inatsisaat malillugit pisinnaatitaaffiit pisussaaffiillu atuutsinneqassasut, matumani ilanngullugit atortunik pisinerit tunisinerillu qanga pisimanerini, amigartoorutinillu ikiunut tulliuuttunut nuussisinnaanerit il.il. Ingerlatitseqqinnerup kingunerisa ilagaat suliffeqarfiit killilimmik akileraartussaataasut allannguinerni tunisineriniluunniit ajunaarutaasa iluanaarutaasaluunniit akileraaruserneqannginnissaat. Suliffeqarfiup pigisai, selskabimi pisinerimik nalaani akiusut malillugit akileraarutaasussaapput. Suliffeqarfiup killilimmik akileraartussaataasup pigisaminik akileraarutitigut nalikilliliineri selskabip nalikilliliineratut isigineqassapput.

Suliffeqarfimmik ingerlatseqqinnermi suliffeqarfiup killilimmik akileraartussaataasup pigisaminik nalikilliliinerata nalingi aningaasarsianit akileraarutit pillugit inatsimmi § 22, imm. 2 malillugu nalikillissavai, suliffeqarfiup killilimmik akileraartussaataasup nalikilliliinerani taakkunannga annikinneruppata. Peqqutissaqavitsilluguli immikkut akuersissuteqartoqarsinnaavoq. Immikkut akuersissuteqartoqarsinnaavoq suliffeqarfiup uppersarsarsinnaappagu allanit piginneqalerneru, piginnittut allanngorneri, oqartussaasut allanngorneri, sulialluunniit allanngorneri aatsitassarsiornermiluunniit nalikilliliisnaatitaanernik atuinngitsoorsimappat. Ilanngulluguttaaq aqqissuussinermi allanngortiterinermi politikkikkut allannguisoqarniarthillugu immikkut akuersisoqarsinnaavoq.

Siunnersuutigineqarportaaq suliffeqarfik killilimmik akileraartussaataitaasoq ingerlatseqqippat piunasaqaataassasoq suliffeqarfiup pigisai tamaasa aktieselskabip anpartselskabilluunniit oqartussaaffigilissagai, suliffeqarfiullu killilimmik akileraartussaataitaasup suliffeqarfiit isumaqatigiissuteqarfigisimasai oqartussanullu akiitsui, matumani akileraartarnermi oqartussat ilanngunnagit, akisussaaffigilissagai. Taamaaliornikkut nalilinnik piginnittussaannermi akileraarnermilu malittarisassat malinneqarsinnaasunngortinneqassapput.

Suliffeqarfimmik killilimmik akileraartussaataitaasumik piginnittunngunnginnermi, taasumalu pisinnaatitaaffiinnik tigusinnginnermi allanik piunasaqaateqarpoq. Aktie- imaluunniit anpartsselskabit killilimmik akileraartussaataitaasut aatsitassanik misissueqqaarnermut, ujarlernermit atuinermullu akuersissutaa suliffeqarfiup tunniunneqannginnerani Naalakkersuisut akuerseqqaartussaapput. Taamattaq piginneqatigiiffik ingerlatitseqqittoq pisussaavoq ullut 30-t qaangiutsinnagit Akileraartarnermut Aqutsisoqarfimmut allannguinneq nalunaarutigissallugu. Piunasaqaatinut tunngaviuvoq suliffeqarfiup allanngortinnera tunineraluunniit siusissukku Akileraartarnermut Aqutsisoqarfiup ilisimareerniassammagu, akileraartarnermilu iluanaarniutigineqarsinnaanera pinngitsoortinniarlugu.

Inassutigineqanngilarli suliffeqarfiup killilimmik akileraartussaataitaasup akileraartarnermut pisussaaffii, aktie- imaluunniit anpartsselskabillu piginneqataassutai, ingerlatitseqqittup pigilertariaqarai. Aallaqqaataani aktie- imaluunniit anpartselskabip pigineqarsinnaanera akornutissaqanngilaq. Suliffeqarfiup killilimmik akileraartussaataitaasup akileraarnissami inissisimanerata ingerlateqqinnissaanut piunasaqaataavoq suliffeqarfiup killilimmik akileraartussaataitaasup pisiarinerani piginnittup aktiaatai piginneqataassutaasalu pisiarinissaat.

Ilanngullugu suliffeqarfiup ingerlanneqarnerata allanngortinnerani tunineraniluunniit suliffeqarfiup tigusap kaaviiartitaasa uninngasuutaasalu akileraarutaanissaasa suliarineqarnissaanni malittarisassanik malunnaatilinnik ilaneqarnissaa siunnersuutigineqarpoq.

*Akuersissutinik tunisineq ("farm out")*

Siunnersuutigineqarpoq aatsitassanik ujarlernissamut, misissueqqaarnissamut atuinissamullu akuersissutillup ilaannaanilluunniit akuersissutillup tunisinermini akigititani naatsorsuusiormi akileraarutaasusaaq ilanngutinngitsoorsinnaagaa, aatsitassanik misissueqqaarnermi, ujarlernermit atuinermilu akuersissummik pisisup misissueqqaarnermi, ujarlernermit atuinermilu inatsisartut inatsisaat § 16, imm. 1 malillugu aningaasartuutinik akiliisimappat ("farm out"). Piunasaqaataavorli pisisup isertitaqarfimmini ukiut tallimassaanni tunisip misissueqqaarnermi ujarlernermilu siunissami aningaasartuutissaasa akuerineqartut tuninerini nalunaarusiornissaaq, suliffeqarfiullu aningaasartuutinik ilanngaataasinnaasunik ingerlatsinermit aningaasartuutinik nalunaarusiornissaa.

Piunasaqaataasut eqqortinneqarpata tunisip akuersissutip tuninerani ilaannaanilluunniit tunisinermini akileraartussaataitaassanngilaq.

Piunasaqaalli tamanna suliffeqarfissuit namminneq akunnermini tunisineranni atuutinneqassanngilaq, taakkumi aalajangersakkap avataaniittutut inissisimammata.

Paasinarsippalli isumaqatigiissut ukiut tallimat ingerlaneranni pilersaarusiit, pinngortitalluunniit atugassarititai pissutigalugit piviusunngortinneqarsinnaanngitsut, Akileraaruseriffik ukiunik pingasunik periarfisseqqissinnaavoq. Taamaaliornikkut pinngortitap killissarititai, soorlu qillerinermit atortussanik sulisussanillu amigaateqalerneq

siuningaa upalungaarsimaffiginiarneqarpoq, soorlu Tunup avannaarsuani pinngortitap pissusaata killiliinera pissutigalugu ukiut tallimat ingerlaneranni piviusunngortinneqarsinnaanngitsut. Piffissamik sivitsuineq ukiut akuersissutaasut tallimat iluini akuerineqarsinnaavoq, soorluttaaq allanut tunisinermi sivitsuisoqarsinnaassasoq. Piffissamilli sivitsuisoqarsinnaanngilaq akuersissutaasut ukiut tallimat qaangiutereerneranni. Piffissamik sivitsuisinnaanermut Akileraaruseriffiup aalajangigai malittarisassat atuuttut malillugit Akileraarusiinernik aalajangiisartunut suliasanngortinneqarsinnaavoq.

Aatsitassanik misissueqqaarnissamut, ujarlernissamullu pisisoq akiliissanngippat, atugassarititaasut malillugit tunisisup akuersissuteqalernermigut akiligassaraluani akilinnngippagit akiligassaq malittarisassat malillugit akileraarutaassaaq. Apeqqutaanngilaq akiliutit aningaasaagaluarpata, aktiaagaluarpata, akuersissummulluunniit piginneqataassutaagaluarpata, pisisorlu Kalaallit Nunaata avataaneersuuppat, nunaqavissuugaluarpalluunniit.

Pisisup ukiut tallimaniit ukiut arfineq pingasut angullugit ingerlanerini aatsitassanik misissueqqaarnermut, ujarlernermullu akiliutissani atorpagit, tunisisup ukiumi aningaasarsiorfiusumi aningaasarsiai akileraaruteqaataasussat aningaasartuutitut nalunaarutigippagit naatsorsuinermini ilanngutissavai, paasinarsippat piffissarititaasup qaangiutereerneragut akiliutiginiarneqartut. Akiliulli taamaattoq piffissarititaasup qaangiunneragut isertitatut akileraarutaasussatut nalunaarutigineqassaaq.

#### *Allannguinissat kingunerisinnaasai*

Siunnersuutigineqarpoq ukiumi aningaasarsiorfiusumi 2010-miit aningaasarsiat akileraaruteqaataasussat akileraartarnermut inatsimmi § 2, imm. 1, nr. 17 imaluunniit § 2, imm. 5, oqaaseqatigiit aappaat naapertorlugit killilimmik akileraartussaataasut inummut ilanngaammik annikillisissinnaagaat, taamaalilluni inuit killilimmik akileraartussaataasut assigalugit akileraartussanngorlugit.

#### *Avataanit suliaartortut akileraartarnermi attuumassuteqarnissaat*

Siunnersuutigineqarpoq sulisoq illoqarfiit nunaqarfiillu avataanni sulinissaminut atorfinitsinneqarpat, qaammatinilu arfinilinni siuliini Kalaallit Nunaanni kommuninut akileraartarsimanngippat, Akileraaruseriffik akileraarfigisassagaa.

Siunnersuutigineqarpoq Akileraaruseriffik sulisup akileraarfigisassagaa Inatsisartut aatsitassanik misissueqqaarnermi, ujarlernermi piaanermiluunniit inatsisaat malillugu suliffeqarfimmi sulilersimaguni imaluunniit Inatsisartut inatsisaat malillugu suliffeqarfimmi akuersissutilimmi aatsitassanik avammut tuniniaasumi sulilersimaguni qaammatillu siulii arfinillit Kalaallit Nunaanni kommuninut akileraartarsimanngikkuni.

Siuliini taaneqartuni avataanit suliaartortup akileraartinnerani iluanaarutit siunnersuutigineqartutut nunamut tamarmut akileraarutitut, immikkullu nunamut tamarmut akileraarutitut akileraartinneqartassasoq, katillugu 37 procentinik.

Sulisut qaammatit arfinillit Kalaallit Nunaanni akileraartareersimasut akileraarutai pisarneq malillugu kommunit landskarsillu aveqatigiissavaat.

Suliap naammassinerani atulerneranilu sulisut akileraarutaat, apeqqutaatinnagu maanngaanersuunersut, nunanilluunniit allaneersuunersut, malittarisassat malillugit aveqatigiinneqassapput.



Siunnersuut malillugu aatsitassarsiorlut avataaneersut akileraarutaat ataavartumik landskarsip pissarai.

Ukiuni tulluittuni suliffeqarfiit avataaneersut aningaasaliinissaat neriuutigineqartorujussuuvoq. Aallaqqaammut tassaapput alumiiniumik aatsitsivissaq, erngup nukinganik innaallagissiorfiit, aatsitassarsiorfiit nutaat, uuliamillu ujarlernerit. Suliassat annertungaarmata sulisunit Kalaallit Nunaanneersunit tamakkiisumik suliarineqarsinnaangillat. Pilersaarutit arlaannaalluunniit piviusunngorpat pisariaqarpoq nunanit allanit amerlasuunik sulisussarsionnissaq. Nalinginnaassaaq piffissami aalajangersimasuinnarmi Kalaallit Nunaanniinnissaat, pisortanillu isumalluuteqarnerat killeqassalluni.

Maniitsumi aatsitsiviliortoqarpat pisariaqassaaq innaallagissamik imermillu pilersuinerit isumagineqarnissaat, inissialiortiternerit, atuarfiliernerit assigisaallu sulisussat aatsitsivissaq atulernat pisariaqartissavaat. Suliassanut aningaasartuutinullu nammaqatigiinneq naapertorlugu aningaasartuutit tamakku aningaasanut inatsimmit, tassalu landskarsimit akilernerqartussaapput.

Pilersaarutit piviusunnguleralluuttartut amerlasuut kommunit killeqarfiisa iluiniipput. Malittarisassat malillugit tamakkiisumik killilimmilluunniit akileraartussaataasut kommunit najugarilikkaminnut akileraartussaapput. Tamakku oqimaaqatigiissarniarlugit akileraartartussat atorfissaqartitaat kommunit isumagissavaat, soorlu atuarfiit, meeqqeriviit, aqquserngit, angerlarsimaffinni ikiortit il.il. Avataanit suliarortunit taaneqartut killilimmik atornerqarnissaat naatsorsuutigineqarpoq.

Malittarisassat malillugit sanaartornerit illoqarfiit nunaqarfiillu avataanni ingerlanneqassapput. Maniitsumi alumiiniumik aatsitsivissaq illoqarfiup avataaniittutut aalajangersakkat malillugit sananeqassaaq, Nuummili Qinnorpup sanaartorneqarnera illoqarfiup avataaniittutut isigineqanngilaq.

Akileraartarnissami qaammatinik arfinilinnik killiliinerup tunuliaqutigaa aningaasarsianit akileraarutit pillugit inatsimmi § 1, imm. 1, nr. 2, tunngavigalugu, qaammatillu arfinillit sinnerlugilluunniit nunatsinneereerunik sulisut tamakkiisumik akileraartalissapput. Tamanna tunuliaqutaavoq qaammatini arfinilinni nunarput sulisut qimassimareerunikku killilimmik akileraarsinnaatitaanissaannut killiliussaammat.

Siunnersuummi suliffeqarfinni sulisut kisimik pineqarput. Namminersorlutik suliffeqarfiutillit malittarisassat malillugit akileraartussaapput.

Allannguutissatut siunnersuutit inatsisip atuutilerneragut atuutilissapput. Inatsisip atuutilernera ilutigalugu atorfeqalersut kisimik inatsimmi pineqarput, inatsisilli atuutilinnginnerani atorfinittut manna malittarisassat malillugit kommunerisamut akileraartassapput.

#### *Tamakkiisumik akileraaruteqarneq*

Taaneqareersutut suliffeqarfiit avataaneersut aningaasaliinissaat piviusunngussappat sulisunik avataaneersunik amerlasuunik tikisitsisariaqarpugut. Naatsorsuutigineqassaaq suliarortut piffissami killilimmi maaniinnissaat, suliarortullu amerlasuut aggerfiisa Kalaallillu Nunaata akornini marloqiusamik akileraanginnissaq siunertaralugu isumaqatigiissuteqarfigineqaratik, nunaasalu akileraartarnermut aqqissuussineri nunatsinnit allaanerulluinnassasut.

Taamaattumik siunnersuutigineqarpoq illoqarfiit nunaqarfiillu avataanni suliaartortut, qaammatillu siulliit arfinillit kommuninut akileraartarsimangitsut tamakkiisumik 35 procentinik akileraaruteqartarnissaat. Taamatutaaq sulisunut aatsitassanik misissueqqaarnernik, ujarlernernik piaanernillu suliaqartut, qaammatillu siulii arfinillit kommunit arlaannut akileraartarsimangitsut tamakkiisumik akileraaruteqartinneqartassapput.

Inatsisartulli imermik sermimillu avammut tuniniagassamik atuinissamut inatsisaat naapertorlugu tunisassiornissamik akuersissutilinnut suleriaaseq atorsinnaassanngilaq, naatsorsuutigineqartariaqarmat suliffeqarfiit taamaattut killilimmik avataaneersunik sulisoqarnissaat.

Atorfinitsitaanermi isumaqatigiissut malillugu aningaasarsiat A-t tamakkiisumik akileraarutaassapput. Aningaasarsiat A-t naatsorsorneqannginneranni ilanngaateqartoqarsinnaanngilaq.

Kommunini 42 procentinik akileraarfiusuni tamakkiisumik akileraaruteqartarnissami 35 procent tagginneqarpoq. Akileraartartoq ukiumut 300.000 kr.-inik akissarsisartup kommunimut 42 procentinik akileraartitsisartumut pissutsit piviusut tunngavigalugit 33,90 procentinik akileraartarpoq. Taamatut akissarsiallup ilanngaatigisinnavaai pensiuunisiaqalernissamit ileqqaakkanut akiliutit, ernianut aningaasartuutit il.il. Akileraartartoq tamakkiisumik akileraaruteqartitaasup periarfissat tamakku iluaqutigisinnaanngilai. Nalinginnaasumik akileraartartup inuiaqatigiinni kiffartuussinerit, soorlu atuarfiit, paaqqinnittarfiit, inunnik isumaginninnerit allallu iluaqutigisinnavaai, tamakkiisumillu akileraaruteqartartup qaqutiguinnaq pisariaqartissavaai.

Sulisoq isertitaqartoq tamakkiisumillu akileraaruteqartussa, saniatigullu aqqissuussinermut uuttuutinnngitsumik allanik A-nik aningaasarsialik tamakkiisumik akileraaruteqartarnermi aqqissuussinermi akileraarsinnaanngilaq, malittarisassalli nalinginnaasut tunngavigalugit nalunaarsuissalluni. Tamakkiisumik akileraaruteqarnermi aqqissuussineq taamaallaat illoqarfiit nunaqarfiillu avataanni sanaartortunut aatsitassarsiortunulluunniit atuutissaq. Sulisoq aningaasarsianik A-nik allanik isertitaqaruni Kalaallit Nunaanni akileraartartut assigalugit pisinnaatitaaffeqarlunilu pisussaaffeqassaaq.

Tamakkiisumik akileraaruteqartarnerup aqqissuunnerata saniatigut sulisoq isertitaqarpat malittarisassat nalinginnaasut malillugit akileraartinneqassaaq. ”Isertitatut allatut” taaneqarsinnaapput maani nunaniluunniit allani inuussutissarsiornikkut isertitat, nunani allani akissarsiat isumagininninnermiluunniit isertitat. Sulisoq Kalaallit Nunaanni akissarsiaqartup aningaasarsiai A-nik taaneqassapput, kingusinnerusukkut suliffimmut tamakkiisumik akileraaruteqartussaataasumut allamulluunniit nuukkaluaruni, atajunnaaruniluunniit.

Ilanngulluguttaaq siunnersuutigineqarpoq amigartoorutit, inummut ilanngaatit aammalu aappariit akornini aningaasarsiat B-t akileraarutaasussaannngitsut atunngitsuukkat aapparissamut nuunneqarsinnaassanngitsut, sulisup akissarsiaasa 50 procentii sinnerlugilluunniit tamakkiisumik akileraaruteqartussaannerup aqqissuunnerata iluaniippata. Taamaallilluni sulisoq tamakkiisumik akileraaruteqartartoq Kalaallillu Nunaanni akileraartussaataasumik aappaqarpat aqqissuussinermi sillimaffigineqareerpoq. Tamakkiisumik akileraaruteqartussaannermi aalajangiussamut uniuinerussaaq ilanngaasinnaatitaaneq, inummullu ilanngaatip aapparissamut ingerlateqqinnera. Illuatungaagulli pissusissamisussaaq piffissami sivikitsuinnarmi atorfeqarnermi ingerlatitseqqissinnaaneq tamakkiisumik akileraaruteqartartup akissarsiaasa 50 procentii akileraaruteqataasussatut aningaasarsiai tamakkiisumik akileraarutaassappata.

### 3. Aningaasatigut allaffissornikkullu pisortanut suliffiutilinnullu kingunerisinnaasaat

#### *3.1 Suliartoqquneqarsinnaanermut atatillugu akeqanngitsumik biileqartitaaneq*

Suliartoqquneqarsinnaatitaalluni biilini akisussaaffeqarnerup pisariinnerusumik aaqqissuunneqarnissaanut una siunnersuutaavoq. Naatsorsuutigineqarpoq aaqqissuussinermi uani amerlanerpaamik biilit 100-t pineqarmata. Siunnersuutigineqartoq malillugu naatsorsuutigineqarpoq iluanaarutissat 1.000.000 kr.-inik annikillinissaat, kommuninut 750.000 kr.-it namminersorlutillu oqartussanut 250.000 kr.-it. Siunnersuutip malittarisassanik pisariinnerulersitsinissaa pisortat allaffissornerinut akileraartartunulluunniit kinguneqassanngilaq.

#### *3.2 Nalikilliliisarnermi malittarisassanik erseqqissaaneq*

Allaffissornikkut imaluunniit aningaasatigut pisortanut suliffiutilinnullu sunniuteqassaangilaq.

#### *3.3 Akuersissutinik nalikilliliinerit*

Siunnersuutigineqarpoq aningaasanik nalillinnik nutaanik - *akuersissutinik piginneqataasutinik* - nalikilliliinerni inatsisitigut malittarisassat ersarissarneqassasut paasiuminarsarneqarlutillu.

Siunnersuummi suliffeqarfiutillit aatsitassarsiornermi ujarlersut atuisullu akuersissutinik pisinermi nalikilliliisinnaaneranni aningaasatigut isertitaqarnerunissaannut kaammattuutaavoq. Siunnersuut iluaqutsiullugu akuersissutinik pigisallit periarfissaqalissapput akuersissutit pissarsiamik pissarsiatulli allatut nalikillilernissaannut. Siusinnerusukkulli inatsisissatut siunnersuutip imaanisulli pigisanik allanik nalikilliliisinnaanerit allaaneruvoq.

Malittarisassat nutaat oqartussaasut akuersissutinik nutaanik agguaassinissaannut periarfissagissaarnerutisisinnaalersippaat, suliffeqarfiillu akunnerminni akuersissutinik, ilaannaannilluunniit tunisisinnaanerimi malittarisassat tigujuumarninngortippaat. Taamaaliornikkut suliffeqarfiit nunanit allaneersut Kalaallit Nunaanni aatsitassanik misissueqqaarnissanut, ujarlernernut paaanissanullu kajumminnerulersissavaat.

Kalaallit Nunaata nunataata iluani pisuussutinik nutaanik ujarlernissanut, ujarlertuinnarnissanullu inuiaqatigiinnut aningaasatigut iluaqutaasussanik periarfissiisaaq.

Ilagitillugu qularnanngilaq siunnersuutip kinguneriumaaraa(nalikilliliinerit allat assigalugit)nalikilliliinerit aqutigalugit akileraarutinik suliffeqarfinnit annikinnerusunik isertitaqartalernissaq. Aatsitassarsiornerilli eqqarsaatigalugit kingunerissavaa suliffeqarfiit amerlanerit aatsitassanik ujarlilernissaat, tassunga peqatigitillugu akissarsianit, iluanaarutinit, pilersuisunillu Kalaallit Nunaanni angerlarsimaffeqartunit akileraaruteqaataasussanik isertitaqarnerulernissaat.

Paasissutissat maannakkut pigisat tunngavigalugit oqaatigiuminaakkallarpoq siunnersuutip piffissaq sivikinnerusoq eqqarsaatigalugu iluaqutissartai, ilisimaneqavinningmammi akuersissutinik, akuersissutillu ilaannik niuernerimi isertitassat qanoq annertutiginissaat. Piffissarli ungasinnerusoq eqqarsaatigalugu qularutigisariaqanngilaq aatsitassanik iluanaarutaasinnaasunik nassaartoqariarpat ujarlerumasut paaajumasullu amerlinissaat.

#### *3.4 Suliffeqarfiit killilimmik akileraartussaataasut allanngortiternerit*

Akilerartarnermut atatillugu suliffeqarfinnik ingerlatitseqqittut akilerartarnissaat inatsisitigut periarfissagissaarnerulersillugillu suliffeqarfiit Kalaallit Nunaanni angerlarsimaffeqartut allangortiternissaannut tuninissaannullu akilerartarnikkut malittarisassat pisariaqartinneqartut pisariinnerulersissavaat.

Inatsisissatut siunnersuummi suliffeqarfinnik ingerlatitseqqinnissani allangortiterinissanut aningaasatigullu piumasarisasaasut takuneqarsinnaapput, pingaarnerutillugit pigisat uninngasuutit kaaviiartitallu suliffeqarfinnit aktie-aamma anpartselskabinit killilimmik akilerartussaasunit ingerlateqqineqartut akilerartussaataitanerannut malittarisassat erseqqarinnerusut.

Suliffeqarfinnut Kalaallit Nunaanni angerlarsimaffeqartutut nalunaarsortittunut akilerartutitigut misissueqqaarnerni, ujarlernerni atuinernilu ajunaarutit piginneqatigiiffimmut nutaamut aningaasatigut iluaqutissanngorlugit nuunneqarsinnaalerput. Suliffeqarfinnut killilimmik akilerartussaataitaasunut aatsitassanik misissueqqaarnermut, ujarlernermut piiaanissamullu akuersissutinik pigisaqartunut inatsisissaq atorluarneqanngippat suliffeqarfinnik allangortiterinermi, tunisinermilu suliffeqarfinnut annertuumik aningaasatigut annaasaqataassaaq.

Naatsorsuutigisariaqarpoq suliffeqarfinnut aatsitassarsiornermik ingerlataqartunut Kalaallit Nunaanni aatsitassanik misissueqqaarniartunut, ujarlertunut piiaaniartunullu ajunaaruteqarnerit taamaattut sunniuteqarnerlunnissaat.

Naallu siunnersuut malillugu ajunaarutitaqarsinnaagaluartoq, naatsorsuutigineqarpoq inatsisissatut siunnersuutip ilorraap tungaanut iluaqutaanissaa.

Aningaasarsianit akilerartutit pillugit Inatsisartut inatsisaata allangortinneqarneranik Inatsisartut inatsisaat nr. 3, 30. november 2009-meersoq malillugu allannguutissami Kalaallit Nunaanni suliffeqarfiit killilimmik akilerartussaataitaasut ilanngunneqarput. Ikaarsaariarnermi inatsimmi ilanngunneqarportaaq ukiumi aningaasarsiorfiusumi 2009-mi aningaasarsiatik akilerartuteqaataasussat, ukiunilu siuliini aningaasarsiatik akilerartuteqaataasussat ilanngullugit naatsorsorsinnaalerpaat. Nammineerluni nalunaarsuisussaataitanermut piffissaq killiliussaq sulii qaangiutinngimmat maannakkorpiaq siunnersuutip kingunerisinnaasai oqaatigiuminaakkallarput.

Naatsorsuutigineqarpoq suliffeqarfiutilinnut oqartussaasunullu allaffissornikkut siunnersuutip sunniuteqarnissaa.

### *3.5 Akuersissutit ilaannik tunisinerit (“farm out”)*

Nunarsuaq tamakkerlugu uuliasiortitseqatigiiffinnit aatsitassarsiorfiutilinnillu tamanit atorneqartoq malittarisassatigut nalimmassaaneq “farm out” aamma “earn out” inatsisissatut siunnersuutaavoq. Siunnersuut Norgemi aaqqissuussineq qanillattorlugu suliaavoq.

Siunnersuummi siunertarineqarpoq Kalaallit Nunaanni aatsitassanik misissueqqaarnerni ujarlernernilu akuersissutinik, akuersissutilluunniit ilaannik tuniniaanermi akilerartooqassanngitsoq, pisisup aatsitassanik misissueqqaarnissami ujarlernermilu aningaasartuutit akilerpagit.

Kalaallit Nunaanni aatsitassanik misissueqqaarnerit ujarlernerillu annertusarniarlugit inatsisissatut siunnersuutaavoq. Taamaaliornikkut suliffeqarfiit minnerusut suliffeqarfinnik annerusunik aningaasaliisinnaasunik suleqateqartalernissaat anguniarneqarpoq, tamannalumi aningaasartuutaaqisumik suliaqarnermi avaqqunneqarsinnaanngilaq.

Siunnersuut takuinnarlugu ingerlaannaq iluanaarutaasinnasunik annaasaqarfiusinnaasutut isikkoqarpoq, aatsitassanilli misissueqqaarnerit ujarlernerillu annertusippata sunniutaarutissaq. Siunissaq ungasinnerusooq eqqarsaatigalugu naatsorsuutigineqarpoq aatsitassanik piiassallugit imminut akilersinnaasut piarnerini siunnersuut iluaqutaassasoq.

Aaqqissueriaatsip “farm out” aqputigalugu isumaqatigiissusiornerit aaqqissuunnerisa pisariunerat eqqarsaatigalugu nalilersorneqassaaq siumungaaq akileraaruserinermi allaffissornikkut isumaginnittunit inatsisit malillugit isumaqatigiissutit eqqortinneqarnersut nakkutigineqassaaq.

### *3.6 Kinguneqartitsinernut allannguutit*

Inuit pineqartut killeqarneri pissutigalugit siunnersuummi inummut ilanngaataalajangersagaq iluanaarutitigut annertunerusumik sunniuteqarnissaa naatsorsuutigineqanngilaq. Ilanngullugu naatsorsuutigineqarpoq sulisunik allamiunik tamakkiisumik akileraaruteqartitsinissaq aalajangiiffigineqarpat sunniutaarunnissaa.

### *3.7 Avataaniit suliarortut akileraartarnikkut inissisimanissaat*

Siunnersuutip kingunerissavaa qaammatit kingulliit arfinilli Kalaallit Nunaanni kommuninut akileraaruteqarneq ajorsimasut piumasaqaatit ilaat malillugit Akileraaruseriffik akileraarfigisalisagaat.

Siunnersuutip kingunerissavaa suliarortut taakku akileraarutaat landskarsip pisassagai.

Siunniussami uani ilimagineqanngilaq annertunerusumik kommuninut Namminersorlutillu Oqartussanut sunniuteqarumaartoq.

Illoqarfiit nunaqarfiillu avataanni aatsitassarsiornerit sanaartornerillu annertusippata suliarortut avataaneersut akileraarutaat kommuniunngitsut, landskarsilli pisassavai. Maannakkorpiaq suliarortussat qanoq amerlatiginissaat ilisimaneqanngimmat iluanaarutaasinnasut qanoq annertutiginissaat oqaatigiuminaappoq.

Allaffissornikkut pisortanut suliffeqarfiutilinnulluunniit siunnersuut sunniuteqassanngilaq.


### *3.8 Tamakkiisumik akileraaruteqartarneq*

Siunnersuummi aalajangersakkat tunngavigalugit tamakkiisumik isertitat 35 procentiinik akileraartitsineq Akileraaruseriffiup allaffissornerani suliarortullu avataaneersunut ajornaquteqanngitsumik suliarineqarsinnaapput.

Atorfinitsitaanermi isumaqatigiissut malillugu sulisoq isertitaminik tamakkiisumik akileraaruteqartassaaq. Tamakkiisumik akileraaruteqartalernissami aalajangersakkat tunngavigalugit akileraarutit qanoq annertutigisut landskarsip pisassaneraa sulisut amerlassusaasa, akissarsiaasalu aalajangertassavaat.

Aningaasatigut isertitassanik naatsorsuineq (akissarsiat koruuninngorlugit) landskarsimut akileraarutissat ilanngullugit titartaganngorlugu takuneqarsinnaavoq.

Figur 1. Avataanit suliarortut akissarsiaasa akileraarutissaat



Avataanit suliarortut amerlassusaat tunngavigalugit tamakkiisumik akileraarutaasa takussutissartaat mio. kr.-inngorlugit

Titartakkami takuneqarsinnaavoq avataanit suliarortut nunatsinni akileraartussaataatillutik akissarsiaat assersuutigalugu 120 million kr.-iuppata landskarsip 42 million kr.-it pissarsiarissagai.

#### 4. Avatangiisunut pinngortitamullu kingunerisinnaasai

Pingaartumik aatsitassarsiorsinnaaneq eqqarsaatigalugu suliffeqarfiit Kalaallit Nunaannut aningaasaleerusussusaat siunnersuut tunngavigalugu toqqammavissaqarluarsorinarpoq. Aningaasaliinerit taamaattut soorluuna avatangiisit pinngortitarlugu eqqarsaatigalugit sunniuteqarsinnaasut. Toqqammavigisalli maannamut pigisat tunngavigalugit oqaatigiuminaakkallarpoq qanoq sunniuteqarsinnaatiginerat.

#### 5. Allaffissornikkut innuttaasunut sunniutigisinnaasai

Naatsorsuutigineqarpoq siunnersuutip innuttaasunut tamakkiisumik akileraaruteqartartussanut allaffissornikkut sullinneqarnerannut oqilisaataassasoq.

#### 6. Naalagaaffeqatigiinnermut Namminersorlutillu Oqartussat ataqatigiinnerannut sunniutigisin-naasaat

Siunnersuut naalagaaffeqatigiinnermut attuumassuteqanngilaq

#### 7. Oqartussaasunut kattuffinnullu tusarniaanerit

Siunnersuut makkununga tusarniaassutigineqarpoq:

KANUKOKA, Grønlands Arbejdsgiverforening, Nunaqavissut Suliffiutillit Kattuffiat (NUSUKA), Sulinermik Inuussutissarsiuqartut Kattuffiat (SIK), KNAPK, Deloitte, Grønlands Revisionskontor, Nunatsinni Advokatit, Greenland Development, Suliffeqarnermut Sulisoqarnermullu Naalakkersuisoqarfik, Inunnik Isumaginninnermut Naalakkersuisoqarfik, Peqqinnissaqarnermut Naalakkersuisoqarfik, Aalisarnermut, Piniarnermut Nunaateqarnermullu Naalakkersuisoqarfik, Attaveqarnermut Ineqarnermullu Naalakkersuisoqarfik, Kultooreqarnermut, Ilinniartitaanermut, Ilisimatusarnermut Ilageeqarnermullu Naalakkersuisoqarfik, Nunami Namminermi Pissutsinut

Naalakkersuisoqarfik, Pinngortitamut Avatangiisinut Aatsitassaqaqarnermullu Naalakkersuisoqarfik.

Tusarniaanermi akissuteqartuupput KANUKOKA, Kommuneqarfik Sermersooq, Grønlands Arbejdsgiverforening, Deloitte, Grønlands Revisionskontor, Nuna Advokater, Nunatsinni Advokatit, PriceWaterhouseCoopers, Greenland Development og Departementet for Sociale Anliggender.

## **Inatsisissatut siunnersuummi aalajangersakkanut ataasiakkaanut oqaaseqaatit**

### **§ 1-imut**

*Nr. 1-imut.*

Siunnersuutigineqarpoq, Kalaallit Nunaanni atortussiassat aatsitassanit pisut pillugit inatsit, aningaasarsianit akileraarutit pillugit inatsimmi tamani allaqqasut, Kalaallit Nunaanni aatsitassat pillugit ingerlatallu tamatumunnga pingaarutillit pillugit Inatsisartut inatsisaannik taarserneqassasoq. Tassuunakkut erseqqissarniarneqarpoq UKA 2009-mi Inatsisartut aatsitassarsiorneq pillugu inatsisaat, nutaamik malittarisassaliunneqarnera.

*Nr. -2-mut*

Siunnersuutigineqarpoq sulisut angerlarsimaffiup suliffiullu akornini biilini, imm. 5-imi allaqqasutut angalasarnerat, suliffinni suliartoqquneqarsinnaanermut atatillugu biileqartsitaaneq akileraaruteqaataassanngitsaq.

Suliffinni suliartoqquneqarsinnaanermut atatillugu biilini immikkut atugassianik, sulisut namminerisamik atuinerat, sulisitsisuminnit allaganngorlugu pisussaatitaappata namminermut akileraaruteqaataassanngillat.

§ 19, imm. 8-mi allaqqasup allaassutigisaanik, sulisup suliartoqquneqarsinnaanermut atatillugu biilit atukkani angerlarsimaffiup suliffiullu akornini angallassisutitut atornerisa saniatigut namminerisaminik atorsinnaavai. Siunnersuut malillugu suliartoqquneqarsinnaanermut atatillugu biilit namminerisamik pisiniarfiliutitut, meeqqaminik tunniussinermini aallernermini, ilaqqat ikinngutillu assigisaallu pulaalersillugit atorsinnaavai.

Imm. 8 assigalugu, biilit akileraaruteqaataannngitsumik atorsinnaanerannut piunasaqaataavoq suliffinni suliartoqquneqarsinnaanermut atatillugu atorneqarpat. Suliartoqquneqarneq tassani pineqarpoq ”sumiiffimmut aalajangersimasuunngitsumut” aggersarneqarneq. ”Sumiiffimmut aalajangersimanngitsumut” paasineqassaaq suliffeqarfiup avataanut ilisimanngeriikkamut suliartorallartartoq. Sulisup aggersarneqarfini ilisimareeraluaraangamiullunniit apeqqutaanngilaq, apeqqutaavorli ornigassai arlaqangaarmata siumungaaq sumunngalernerluni ilisimaneq ajormagu. Sulisup suliffia aalajangersimasooq tassaannngilaq ”sumiiffik aalajangersimanngitsooq”, sulisitsisualunniit sumiiffinni arlalinni immikkoortortaqqarfeqaralarpat.

Imm. 9 malillugu suliartoqqusinerussappat sulisooq immikkut ittumik akissarsitinneqassaaq, aggersarneqaruni aggersarneqanngikkuniluunniit. Imm. 9 malillugu sulisooq attaveqaataasooq

suliffiup nalinginnaasup avataatigut sulisitsisumi illuutaani ajortoqarnerani tillinniartoqarneraniluunniit aggersarneqartoq suliartoqquneqartutut taaneqarsinnaangilaq.

Sulisoq suliartoqquneqarsinnaasutut taaneqassappat nammineersinnaassusia killilernerneqarsimassaaq. Sulisoq suliartoqquneqarsinnaasutut taaneqassaguni aggersarneqarsinnaanerata nalaani qasuersimallunilu imigassartorsimassanngilaq. Aammattaaq suliartoqquneqarsinnaanera piviusuussaaq. Pinngitsoorani takkuttussaataaneq suleqatiminut oqarasuaatikku kalerriilluni paarlaqqunnarsinnaaneq, piviusutut isigineqanngilaq.

Akilerartussaataaanginnissamut piumasaqaataalluinnarpoq, sulisitsisup sulisuni suliffimmut suliartoqquneqarsinnaanera pillugu allaganngorlugu uppersarsinnaassagaa.

Sulisoq biilit namminerisaminik, tassunga ilanngullugu suliffimmi angerlarsimaffimmilu akornanni angallassitutigippagit, allakkatigullu suliartoqquneqarsimanerminut uppersaatissaqanngippat § 19 naapertorlugu biilnik atugaqarnini akileraaruteqaatigissavaa.

*Nr. 3-mut*

Aningaasarsianit akileraarutit pillugit inatsisip § 22-ia, selskabinut assigisaannullu Kalaallit Nunaannut tamakkiisumik akileraartussaataasunut, inatsisip § 1, imm.1, nr. 3-14-mut tunngavigalugit, selskabinut assigisaanullu Kalaallit Nunaannut killilimmik akileraartussaataasunut § 2 naapertorlugu, taaneqartunut tamanut atuuttuunera erseqqissaatigineqassasoq siunnersuutigineqarpoq

*Nr. 4-mut*

#### Imm. 1-imut

Naak aningaasarsianit akileraarutit pillugit inatsimmi § 22-mi malittarisassani allaqqagaluartoq, aatsitassat pillugit misissueqqaarnernit, misissuinerit piiaanernilu, pisinermi aningaasartuutitut nalikilliliinerit inatsimmi § 22 b malillugu pisassasut siunnersuutigineqarpoq.

Akuersissutitut pineqartunut nalikilliliisinaaneq siunnersuutigineqartumi § 22 b-mi allaqqasut tunngavigineqassapput. Aalajangersakkat § 22-mi allaqqasut, soorlu imm. 2-mi, akigitinneqartut nalikilliliinerillu imm. 5 malillugu annerusumik nalikilliliisinaanerit atuutsinneqassanngilaq.

#### Imm. 2-mut

Taamatullu sanaartukkanut, umiarsuarnut, timmisartunut nalikilliliisarnerit assigalugit, aatsitassat pillugit misissueqqaarnerit, misissuinerit piiaanerillu akuersissutit ataasiakkaat, akuersissutilluunniit ilaannaat nalikillilernerneqartassapput.

#### Imm. 3-mut

Ukiumi tassani akuersissutit akuersissutit ilaanilluunniit tunisoqarpat, pisisoq pisiaminik nalikilliliisinaavoq tunisisorli tunisaminik nalikilliliisinaanani.



#### Imm. 4-mut

Siunnersuutigineqarpoq pisinermi akigitinneqartup nalinga ukiuni 10-ni annertussuseqatigiiaarlugit nalikillilerneqartassaaq kulbrintisionermi akuersissutinut, aatsitassarsiornermilu akuersissutinut ukiuni 4-ni. Akuersissummik pissarsisoqarpat, pissarsiarineqarneraniit piffisarititaasoq sivikinneruppat pissarsiarineraniit akigitinneqarsimasup piffissarititaasup sinneruttup iluani ukiumut assigiiaammik nalikilliliisoqartassaaq. Piffissaq nalikilliliisinnaaneq akuersissummik, ilaannaanilluunniit pisinermi ukioq taanna aallartissaaq.

Tassa imaappoq akuersissutip, akuersissutip ilaataluunniit ukiumi tassani pissarsiffiusumiit, nalikilliliinerit pituttorsimasut piffissami pineqartumi annertussuseqatigiiaarlugit ingerlanneqassapput.

Assersuut:

Suliffeqarfik N kulbrintisionissamut akuersissummik suliffeqarfimmit M-imit 10 millioner kr.-nik nalilimmik pisiguni, suliffeqarfik N ukiumi pisiffimmini, tulliuttunilu 9-ni akuersissummik pisinermiit ukiut tamaasa 450.000 kr.-it nalikilliliissugissavai.

Akuersissummik ilaanilluunniit pisisoq taaneqartutuut akileraarutigut nalikilliliinissaminut pisussaataavoq, ukiumilu aningaasarsiorfiusumi ataatsimi arlalinniluunniit akileraarutigut nalikilliliinngitsoorsinnaanngilaq.

#### Imm. 5 aamma 6

Aatsitassat pillugit misissueqqaarnernut, misissuinernut piiaanernullu akuersissutinut iluanaarutit annaasaqaatillu, pigisanik nalilinnik allanik tunisernermi iluanaarutit annaasaqaatillu naatsorsorneqartarneri assigalugit periuseqarnissaq siunnersuutigineqarpoq. Akuersissut ilaannaaluunniit tunineqarpat akilu pissarsiarineqartoq, pisinermi akimit suli nalikillilerutaanngitsumit annertuneruppat, iluanaarut ukiumi aningaasarsiorfiusumi aningaasarsiatut akileraaruteqaataasussatut, ukiumi tunineqarfiani nalunaarutigissavaa, akuersissummilli ilaannaanilluunniit tunisinermi, suliffeqarfiup taamaatinnerani, atorunnaarnerani utertinneraniluunniit pisinermi akimit nalikillilerissutaasinnaasumit annikinneruppat ukiumi akuersissummik tunisiffimmi, aningaasarsianit akileraaruteqaataasussanit annaasaqaataasutut nalunaarutigineqassaaq.

Akuersissutit ilaannik tunisinermi, pisinermi akiusumut naleqqiussisoqartassaaq, iluanaarutit annaasaqaatillu naatsorsorneqarnissaat siunertaralugu.

#### Imm. 7-imut

Siunnersuutigineqarpoq aatsitassat pillugit misissueqqaarnernut, misissuinernut piiaanernullu akuersissutinik nalikilliliisarnerit § 24, imm. 1, nr. 1 naapertorlugu Naalakkersuisut malittarisassaliorinnaanissaannut piginnaatinneqassasut.

Aalajangersagaq, aningaasarsianit akileraarutit pillugit inatsimmi § 24, imm. 1, nr. 1-imi oqaaseqatigiit aappaanni, Naalakkersuisut piginnaatitaanerit nalikilliliisarneq pillugu § 22 b-mi siunnersuutigineqartutut aamma ilaammat.

#### *Nr. 54-imut*

Aalajangersakkanut siunnersuutigineqartunut §§ 58 a-mut aamma 58 b-mut tunngaviusut, suliffeqarfiit kattunnerannut atuuttut, aningaasarsianit akileraarutit pillugit inatsimmi §§ 48-

56 tunngavigineqarput. Kattunnernut sanilliullugit, suliffeqarfiit killilimmik akileraartussaataasut selskabinngorlugit allannguinerit tunisinerillu, selskabit pillugit inatsisitigut malittarisassaliuunneqanngillat. Taamaattumik siunnersuutigineqarpoq inatsisissat ilaat akileraartarnermi inatsisinit allaanerumaartut atorneqassasut.

#### § 58 a, imm. 1-imut

Siunnersuutigineqarpoq suliffeqarfinnik killilimmik akileraartussaataasunik allanngortiterinerit tunisinerillu § 2, imm. 2, malillugu aktieselskabitut anpartselskabitulluunniit Kalaallit Nunaanni angerlarsimaffeqartutut nalunaarsorneqassappata, aktieselskabi anpartselskabiluunniit suliffeqarfiup killilimmik akileraartussaataasup akileraartarnermi inissisimarnga ingerlateqqissinnaagaa.

Ingerlaqqinnermut atatillugu, suliffeqarfiup killilimmik akileraartussaataasup nalikilliliissutigisinnaasai, aningaasarsianit akileraarutit pillugit inatsimmi § 22, nr. 2 naapertorlugu, pigisat nalillit nalikillilersinnaanerisa nalinginut appartinneqassapput, suliffeqarfiup killilimmik akileraartussaataasup akileraarutitigut nalikilliliinera taakkunanga annikinneruppata. Taamaattorli pisut immikkut ittut apequtaatillugit immikkut akuersissummik tunisisoqarsinnaaneq ammaanekarpoq. Immikkut akuersisoqarsinnaavoq suliffeqarfiup uppersarsinnaappagu piginnittut paarlaannerini, piginneqataasut allanngornerini, oqartussaasut allanngornerini sulialluunniit allanngorneri taamaallaat tunngaviuppata, suliffeqarfiullu nalikilliliissutigisinnaasai suli atorneqanngitsut atorissaat kisiat siunertaanngippat. Ilanngulluguttaaq nalikilliliisinnaanermik immikkut akuersisoqarsinnaavoq naalakkersuinikkut aaqqissuussinerit allanngortinniarnearneranni.

Akileraartarnermi piumasaqaatit malillugit ingerlatitseqqittoqarsinnaavoq aktieselskabip anpartselskabilluunniit suliffeqarfiup killilimmik akileraartussaataasup pigisai nalillit tamakkiisumik tiguppagit, ilanngullugit isumaqatigiissuteqartunut oqartussaassuseqartutut pisinnaatitaaffeqartutullu inissisimappata, soorlu pisortanut oqartussaasunut assigisaannullu.

Ingerlaqqittumut piumasaqaataavoq, aktie- imalt. anpartsselskabi, killilimmik akileraartussaataasup, aningaasarsianit akileraarutit pillugit inatsit, akileraaruserinermilu ingerlatsineq pillugu Inatsisartut inatsisaat tunngavigalugit pisinnaatitaaffiinut pisussaataitaaffiinullu tamanut tigusinissaa, tassunga ilanngullugit pisinermi tunisinermilu piffissarititaasut, amigartoorutinillu il.il. ukiup tullianut nuutsisinnaatitaaneq. Ingerlatitseqqinnerup kingunerisinnaavai allannguinermi tunisinermiluunniit amigartoorutit iluanaarutilluunniit suliffeqarfimmut killilimmik akileraartussaataasumut akileraaruteqaataassanngitsut. Suliffeqarfiulli pigisai nalillit selskabip ingerlaqqittup akileraarutigissavai, soorluli killilimmik akileraartussaataasup pisinerata nalaanisut nalilerlugit. Akileraarutitigut nalikilliliinerit suliffeqarfimmit killilimmik akileraartussaataasumit nalikilliliissutaasimasut selskabimit nalikilliliissutaasimasutut isigineqassapput. Ingerlatitseqqinnerup ilaatigut aamma kingunerissavaa, assersuutigalugu aningaasarsianit akileraarutit pillugit inatsimmi § 30, imm. 4, malillugu amigartoorutinik ukiumut tullermut nuutsisinnanermik killiliinerit atuutinngimmata. Soorlu suliffeqarfik aningaasarsiat akileraaruteqaataasussat ukiumi aningaasarsiorfimmi naatsorsorneqartut amigartoorpat, amigartoorutit taakkua ukiumi aningaasarsiorfinni tullerni ilanngaatigineqarsinnaasut, taassuma ataani akuersissutit atorneqarsimanngitsut Aatsitassanut Ikummatissanullu oqartussanut utertinneqartarnissaat.

Aktieselskabimut anpartselskabimulluunniit piumasaqaataasinnaavoq suliffeqarfiup killilimmik akileraartussaataasup pigisai nalillit tamaasa akisussaaffigilissagai, taamaalilluni pisinnaatitaal-luni pisussaataaallunilu suliffeqarfiup killilimmik akileraartussaataasup

isumaqatigiissuteqarfigisaanut akisussaassuseqalerluni, soorlu oqartussaasunut allanut akileraartarnermili oqartussanuunngitsoq allanullu akiligassat killilimmik akileraartussaataasup pigisai nalillit uninngasuutaalu allannortiterinermini tunisinermiluunniit aktieselskabip anpartselskabilluunniit akisussaaffigilissagai. Suliffeqarfik killilimmik akileraartussaataasooq aatsitassanik ujarlernissamut akuersissutinik arlalinnik pigisaqarpat, suliffeqarfimmik ingerlatitseqqittut killilimmik akileraartussaataasup akuersissutaatai tamaasa oqartussaaffigi-lissavai, soorlulu killilimmik akileraartussaataasup akuersissutinik tunisinermini iluanaarutai amigartoorutaalu oqartussaaffigilissallugit. Siunertaavoq killilimmik akileraartussaataasup ingerlatani tamaasa allanguinerup tunisinerulluunniit kingorna taamaatissagai. Taamaalilluni allannortitsinermini tunisinermiluunniit pisariinnerpaamik tunniussisoqarsinnaaqullugu.

Piumasaqaataangilaq suliffimmik killilimmik akileraartussaataasumik piginnittoq aktieselskabimi anpartselskabimiluunniit, suliffeqarfiup killilimmik akileraartussaataasup ingerlateqqitassaataut piginneqatigiissutit, akileraarutitigut pisussaaffii tamaasa pigissagai. Tunngaviusumik aktie – aamma anpartselskabit, suliffimmik killilimmik akileraartussaataasut piginnittuginngisaanit pigineqarsinnaapput. Ajornaqutissartaqanngilartaq suliffeqarfimmik ingerlatseqqittoq pilersinneqaaqajugalarpat.

Aatsitassat pillugit ingerlatallu tamatumunnga pingaarutillit pillugit inatsisartut inatsisaat malillugu akuersissuteqartut, aatsitassat pillugit misissueqqaarnissami, misissuinermini paaanermilu suliffeqarfiit killilimmik akileraartussaataasut iluanaaruteqartut taamaallaat aalajangersakkami pineqarput. Assersuutigalugu suliffeqarfiit killilimmik akileraartussaataasut aatsitassanik ujarlernerni paaanernilu, aningaasarsianit akileraarutit pillugit inatsimmi § 2, imm. 3 tunngavigalugu iluanaarutillit siunnersuummi ilaatinneqanngillat. Ilaatinneqanngillattaq siliffeqarfiit killilimmik akileraartussaataasut suliffeqarfiutaat aatsitassarsionermini ujarlernerni paaanermilu kiffartuussisutut inissisimasut.

#### § 58 a, imm. 2-mut

Aalajangersakkami piumasaqaatit arlallit eqqortinneqarsimanissaat piumasaqaataavoq, aktie – imalt. anpartselskabip allannortiterinermini tunisinermiluunniit suliffeqarfiup killilimmik akileraartussaataasup, akileraarutitigut inissisimaneramik ingerlatiteqqissaguni.

#### § 58 a, imm. 3-mut

Nr. 1-imi piumasaqaataavoq suliffeqarfimmik killilimmik akileraartussaataasumut akuersissut, aktie – imalt. anpartselskabimut nuunneqarsinnaasoq Naalakkersuisunit akuersissutigineqaaqarsimassaaq, aatsitassat pillugit ingerlatallu tamatumunnga pingaarutillit pillugit inatsisartut inatsisaanni maleruagassat tunngavigalugit. Aatsitassat pillugit ingerlatallu tamatumunnga pingaarutillit pillugit inatsisartut inatsisaanni § 88, imm.1 malillugu akuersissutit toqqaannartumik toqqaannangitsumilluunniit, inatsisartut inatsisaat malillugu Naalakkersuisut akuersiteqqaartinnagit ingerlateqqeqqusaanngilaq. Naalakkersuisut taamatut akuersinerminni nakkutilliisuullutillu pisariaqartitsineq naapertorlugu piumasaqaateqarsinnaapput pinngitsooraniluunniit naammassinneqaaqqusisinnaapput, suliffeqarfik killilimmik akileraartussaataasooq allannortitsinermini akuersissutinilluunniit selskabimut tunniussinermini.

Nr. 2-mi piumasaqaataavoq allannortitserinerminut tunisinernulluunniit pigisat nalillit akiligassallu, aningaasarsianit akileraarutit pillugit inatsimmi § 2, imm. 2, malillugu,

suliffeqarfimmut killilimmik akileraartussaataasumut tutsinneqarsinnaasut tamaasa ilanngunneqassasut, pigisat nalillit akiligassallu tassunga tunngasut kisiisa pineqarput. Piumasaqaat aallaaveqarpoq imm.1 aallaavigalugu, tassalu pisuussutit tamakkiisumik tunniunneqassasut, taamaattorli erseqqissarneqassalluni pigisat nalillit akiligassallu killilimmik akileraartussaataasut aatsitassanik misissueqqaarnerni, ujarlernerni piiiaanernilu tunniunneqarnissaat. Paasinarsippat pigisat nalillit akiligassallu killilimmik akileraartussaataasut pigisat allanngortitsinerup tunisinerulluunniit nalaani sulianut allanut atorneqarsimasut, malittarisassat siunnersuutigineqartut tunngavigalugit akileraartarnermi atugassarititaasut ingerlaqqittumit atorneqarsinnaanngillat. Taamatut aalajangersaanikkut anguniarneqarpoq inatsimmi § 30, imm. 4 -mi maleruagassat, selskabinik amigartooruteqarlutik ingerlanneqartunik niueruteqarnikkut atornerluisoqannginnissaa.

Nr. 3 malillugu selskabip ingerlatseqqittup allannguinerit tunisinerilluunniit pillugit ullut 30-it qaangiutsinnagit, allannguinerit tunisinerilluunniit ullormi tassani akileraartarnermut oqartussaasunut nalunaarutiginnissaa pisussaaffigaa, uppersarsassallugulu selskabi ingerlatseqqittoq Erhvervs – og Selskabsstyrelsemi nalunaarsorneqarsimanersoq. Nalunaartussaataanerup Akileraaruseriffik periarfissaqartissavaa ataavartumik allannguinerit tunisinerilluunniit suut ingerlanneqarsimanerannik, taamaalilluni nammineerluni nalunaarusianik tigusinissaminut sillimareerniassammata, soorlu ataani nr. 4-mi allaqqasoq. Oqariartaaseq ”aalajangerneqareerpoq” paasisariaqarpoq ulloq taanna suliffeqarfimmi killilimmik akileraartussaataasumik piginnittup suliffeqarfiup selskabinngortitsinermik aalajangernera, imaluunniit suliffeqarfiup killilimmik akileraartussaataasup selskabimut ulloq tanna tunisinissaminik isumaqatigiissuteqarnera.

Nr. 4 malillugu nammineerluni nalunaartussaataanermi piffissarititaasoq, inatsimmi § 16, imm. 3 tunngavigalugu, akileraaruserinermik ingerlatsineq pillugu Inatsisartut inatsisaat malillugu, allannguinerup tunisinerulluunniit kingorna ullut 90-it qaangiunnerini allannguinerup tunisinerulluunniit kingorna nammineq nalunaarsuinermi suliffeqarfik killilimmik akileraartussaataasooq pissusissamisoorsumik nalunaarusiussavaa.

Suliffeqarfiup killilimmik akileraartussaataasup aningaasarsiat akileraaruteqaataasussat, ukiup aningaasarsiorfiusup nalinginnaasup naaneraniit ulloq allannguiffik tunisiffilluunniit killigalugu aningaasarsiat, piffissaq tamakkerlugu nalunaarusiussavai, piffissap qanoq sivistiginera apeqqutaatinnagu. Angissusiliineq pissaaq apeqqutaatinnagu, suliffeqarfiup killilimmik akileraartussaataasup, allannguineri tunisinermiluunniit atorunnaarsinneqarsimagaluarpat. Suliffeqarfiup ingerlatseqqittup oqaaseqatigiit aappaanni allaqqasut tunngavigalugit pinngitsoorani nammineerluni nalunaarusiortussaataavaoq. Suliffeqarfik ingerlatseqqittoq akileraarutinut, akitsuutinullu tunngasunik piumasaqaateqartoqassagaluarpat akisussaasuvoq, akiliisitsinermik kingunilimmik sunulluunniit pisoqassagaluarpat, inatsit una tunngavigalugu suliffeqarfimmut killilimmik akileraartussaataasumut tutsinneqassapput. Suliffeqarfiup ingerlatseqqittup suliffeqarfiup killilimmik akileraartussaataasup, tapit akileraarpallaarutinillu utertoortissat akileraaruseriffimmut piumasaqaatigisinnavai, akileraaruserinermik ingerlatsineq pillugu Inatsisartut inatsisaanni § 27, imm. 5 naapertorlugu.

Nammineerluni nalunaartussaataanermi malittarisassat immikkuullarissut siunertaraat, suliffeqarfiup ingerlatseqqittup akileraarutitigut inassisimanagera akileraaruseriffimmit paasineqarnissaa qulakkiissallugu. Akileraartarnermi nalunaartussaataanermi killiliussaq aqqutigalugu akileraaruseriffik akileraartartullu pineqartut, suliffeqarfimmi allannguinerit tunisinerilluunniit sivitsorneqarneranni ingerlatseqqittumut akileraarutitigut piumasaqaatit eqqortinneqarnerisut malinnaaffigisinnaniassamatigik.

Nr. 5.-imi piunasaqaataavoq suliffeqarfik killilimmik akileraartussaataasooq akileraarutiniq, akitsuutiniq pisortanulluunniit akiligassaqannginnissaa, soorluttaaq akileraaruseriffimmut nammineerluni nalunaarsuiffik suliffeqarfiup allanngortinneranit tunineranilluunniit ukioq aningaasarsiorfiusoq ullunik 90-inik sioqqullugit naatsorsuutit nalunaarutigineqarsimanissaat piunasaqaataasooq.

Piunasaqaatit immikkoortuata siulliup siunertaraa akiitsut annertusiartunnginnissaat, immikkoortuatalu aappaata suliffeqarfiit killilimmik akileraartussaataasut, allanngortiterineq tunisinerluunniit sioqqullugu ukiumut aningaasarsiorfiusumut tassunga eqqortumik nammineerluni nalunaarsiorsimanngitsut iluarsissuteqarnissaannut kaammattuutit.

Oqariartaatsimi ”nammineerluni nalunaarsuineq pissusissamersoortoq”-mi innersuussutigineqarpoq akileraaruserinermik ingerlatsineq pillugu Inatsisartut inatsisaanni §§ 16-20 –imut aalajangersakkat allaqqasut.

#### § 58 b-mut

Aalajangersakkami aalajangerneqarpoq, suliffeqarfiit killilimmik akileraartussaataasut akileraarutitigut inissisimanerat, selskabinut ingerlatitseqqittunut inatsisitigut qanoq kinguneqarsinnaanersoq.

#### Imm. 1-imut

Aalajangersakkap kingunerissavaa suliffeqarfiup killilimmik akileraartussaataasup pigisaasa nalillit akiligassallu tunineranni amigartoorutit iluanaarutillu allanngortiterinermi tunisinermiluunniit selskabimit ingerlatseqqittumit ingerlanneqalernerata kingorna akileraaruteqaataannginnissaat. Akileraarneq pissaq selskabip pigisai nalillit akiligassallu tunippagit.

Selskabip ingerlatseqqittup aningaasarsiat akileraaruteqaataasussat naatsorsorneqarneranni, pigisai nalillit akiligassallu, selskabimit ingerlaqqittumit pissarsiarineqarsimasutut naatsorsorneqassapput, suliffeqarfimmit killilimmik akileraartussaataasumit pissarsiarinerisut akit tunngavigalugit.

Suliffeqarfiup killilimmik akileraartussaataasup akileraarutitigut nalikilliliissutigisimasinnaasai selskabimit ingerlaqqittumit pissarsiarineqarsimasutut isigineqassapput. Taamatuttaaq isigineqassapput akiligassalinnut amigartoorutinut immikkoortitat, isumaqatigiissutit assigisaallu.

Selskabip ingerlaqqittup, ingerlaqqinnermini pigisat nalillit akornanni pisassanik pissarsisimappat, selskabip ingerlaqqittup pisassarai, selskabip ingerlaqqittup suliffeqarfimmit killilimmik akileraartussaataasumit pisassani, allanngortiterinermi tunisinernulluunniit atatillugu akilineqartutut isigineqassapput.

Selskabi ingerlaqqittoq, ingerlaqqinnermini akiligassanik pissarsisimappat, suliffeqarfiup killilimmik akileraartussaataasup akiitsut pisassarai, selskabip ingerlaqqittup suliffeqarfimmit killilimmik akileraartussaataasumit pisassani, allanngortiterinermi tunisinermiluunniit akilineqartutut isigineqassapput. Allanngortiterinerup tunisinernulluunniit nalaani pisassaraisat akilernerqartutut isigineqassapput tamatuma nalaani pisassat nalingat toqqammavigalugu.

Selskabip ingerlatiteqqittup iluanaarutai amigartoorutaaluunniit, suliffeqarfimmut killilimmik akileraartussaataasumut akiitsut akilerneranni aamma suliffeqarfimmut killilimmik

akileraartussaataasumut pisassat pissarsiarinerat, aningaasarsianit akileraarutit pillugit inatsimmi § 16-i tunngavigalugu akileraaruserneqassapput.

Imm. 2-mut

Pigisat nalillit akiligassallu killilimmik akileraartussaataasumit iluanaarniarneq aqqutigalugu, sulinikkulluunniit iluanaarutaasimasut, selskabip ingerlatseqqittup aningaasarsiatut akileraaruteqaataasussatut naatsorsuinermi suliarineqassapput, selskabip ingerlaqqittup iluanaarniarneq sulinermiluunniit isertitaatut naatsorsuunneqassallutik.

Allanngortiterinermi tunisinermiluunniit pigisat nalillit akiligassalluunniit suliffeqarfimmit killilimmik akileraartussaataasumit selskabimut ingerlatseqqittumit iluanaarniutigineqarsimasutut, sulilluniluunniit iluanaarutitut isigineqarnerat allanngortitsinngilaq.

Imm. 3-mut

Killilimmik akileraartussaataasup isertitaminik akileraarutaasussanik nalunaarsornerini iluanaarutit amigartoorutilluunniit, pappiaqqanik niuernerne isertinngitsoorsimasai, selskabip ingerlatseqqittup pappiaraataatut nalilittut iluanaarutitut ajunaarutitulluunniit akileraarutaasussatut, suliffeqarfiup killilimmik akileraartussaataasup iluanaarutaatut ajunaarutaatulluunniit pissarsiarisimasatut naatsorsuunneqassapput.

Selskabip ingerlatseqqittup allanngortitsinerne tunisinermiluunniit suliffeqarfimmit killilimmik akileraartussaataasumit pappiaqqanik nalilinnik aktienik, obligationinik, pantebrevinik inuinnarnilluunniit pisassaminik iluanaaruteqaruni amigartooruteqaruniluunniit, killilimmik akileraartussaataasup piginittuunerani iluanaarutitut ajunaarutitulluunniit naatsorsorneqassapput.

Imm. 4-mut

Selskabip ingerlatseqqittup pigisat nalillit uninngasuutilluunniit suliffeqarfimmit killilimmik akileraartussaataasumit allanngortitsinerne tunisinermiluunniit pissarsiarisimanngisai naatsorsorneqassapput selskabip ingerlatseqqittup pigisaatut, naatsorsuutaanilu akileraarutissaanilu immikkoortillugit nalunaarsorneqassallutik.

Taamaattoqangippat Akileraaruseriffiup aalajangissavaa suliffeqarfiup killilimmik akileraartussaataasooq selskabimilluunniit ingerlatseqqittoq malittarissat atuuttut § 58 b malillugu pigisat nalillit akiligassalluunniit naatsorsorneranni atuutsinneqassanersoq.

§ 58 c-mut

”Farm out” tassaavoq uuliasiortitseqatigiit akuersissummik ilaanik suliffeqarfimmut allamut tunisinerat, soorlu siusinnerusukkut aningaasartuutaasarsimasut ilaannik utertertiffigitinnikkut, tassungalu ilanngullugu suleqatigiligaq isumaqatigiissuteqarnikkut ujarlernerni annertuumik akiliisillugu. Piginneqataassutsimut pissarsiarineqartumut akiliut ima isikkoqarajuttarpoq, siunissami ujarlernernut tunisisup piginneqataassutsimi nalinganik akiligassaralui pisisumut akiligassanngortinneqarajuttarput. Akiliutit taama ituttut siunnersuummi eqqarsaatigineqarpoq. Uuliasiornissami, gassisiornissami aatsitassarsiornermilu ”farm out” piukkunneqarpoq.

Kalaallit Nunaanni aallaaviugajuppoq isumaqatigiissuteqarluni piginneqataassutit tunniunnerini akileraarusiisarneq. Pingaarnernunngilaq akiliineq qaqugukkut pinersaq. Imaappoq tunisisoq isumaqatigiissummik, ilaanilluunniit tunisinermi iluanaarutaasinnaasunik akileraartussanngortinneqartarpoq.

Akiliut ingerlaavartumik akilersuinerit pigangat (siunissami ujarlernissami aningaasartuutunik akiliinerit) ukiumit isumaqatigiissuteqarfiusumit sivisunerugaangat akileraartitsineq pisarpoq tunisinermi isumaqatigiissummik akiliinerit aallartinneqaraangata. Nalingalu tassaasarpooq tunisisup tunisinermi akigititaa. Pisisup ingerlaavartumik akilersuutaasa nalingat tassaavoq akuersissutip pisaata nalingata annertoqataa - tassa imaappoq pisisoq siunissami aningaasartuutissanut, tunisisup piginneqataassutaata nalinginik akilersugassai.

Ujarlernermi aningaasartuutit pisisup akilersornerani ingerlatsinermi aningaasartuutini aningaasarsianik akileraarutiminit ilanngaatigisinnaavai.

#### Imm. 1-mut

Siunnersuutip malitsigissavaa, aatsitassanik misissueqqaarnissamut, ujarlernermut piiaanissamulluunniit akuersissutinik ilaanilluunniit tunisisup, aningaasarsianit akileraaruteqaataasussat naatsorsorneqarneranni akissarsiat nalunaarutigingitsoorsinnaavai, pisisup aatsitassanik misissueqqaarnermi, ujarlarmi piiaanermilu aningaasartuutit akilerpagit.

Piumasaqaataavorli akiliut imaassasoq, pisisup ukiut aningaasarsiorffiusut tallimassaat qaangiutsinnagu, tunisisup misissueqqaarnernut, ujarlernut piiaanernullu siunissami aningaasartuutissaralut naammassillugit akilereersimassagai, aningaasartuutillu tamaasa ingerlatsinermi aningaasartuutit, suliffeqarfimmit aningaasartuuteqartumit akileraarutitigut ilanngaatigineqarsinnaapput. Pisisup aningaasartuutissai annertunerpaaffilerneqarsinnaapput.

Piumasarisat eqqortinneqarpata akuersissummik, ilaanilluunniit tunisisoq isertitanit akileraartinneqanngissinnaavoq. Piumasarisat eqquutitinneqanngippata tunisisoq imm. 4-mi, 5-imiluunniit allaqqasut malillugit, imaluunniit akileraartarnermi malittarisassat nalinginnaasut malillugit akileraartinneqassaaq.

#### Imm. 2-mut

Malittarisassatut siunnersuutit suliffeqarfissuit iluminni tunisinernut atorneqarsinnaanngillat, aaqquissuussinerummi iluani taamatut iliorsinnanert aalajangersakkami siunertarineqanngimmat.

Nalilersuinermi tunisisoq pisorlu suliffeqarfissuarmi imminnut attuumassuteqarnerisut, aalajangersakkani § 36 a, imm. 4 aamma 5,-imi allassimasut najoqqutarineqassapput. Aalajangersakkat taakku malillugit piginneqatigiiffiit suliffeqarfissuarnut attuumassuteqartut tassaapput, selskabit peqatigiiffiillu, piginneqatigiiffinnut toqqaannartumik toqqaannanngitsumilluunniit piginneqataasut, selskabini 50 procentit sinnerlugit taasisinnaassutsit immikkut tamaasa pigippatigit, aningaasaateqarfiit selskabillu piginneqatigiit aningaasaliissutit 50 procentii sinnerlugu pigippatigit, imaluunniit aningaasaateqarfinni selskabinilu toqqaannartumik toqqaannanngitsumilluunniit taasisinnaassutsit immikkut tamaasa 50 procentii sinnerlugit pigippatigit. Kingulleq eqqarsaatigalugu piginneqataasuni piginneqataasoq ataasiinnaavoq.

Piginneqatigiiffiit suliffeqarfissuarnut selskabit peqatigiiffiillu attuumassuteqartutut isigineqartarput;

- 1) piginneqatigiiffinni tamani aningaasaliisut toqqaannartumik toqqaannangitsumillu piginneqatigiissutit 50 procenti sinnerlugit pigippatigik,
- 2) piginneqatigiiffinni tamani toqqaannartumik toqqaannangitsumilluunniit taasisinnaassutit 50 procentii sinnerlugit piginneqataappata.

Piginneqataasut isumaqatigiissuteqarnerisigut piginneqataassutit 50 procentii sinnerlugit oqartussaanagerusoqartarpoq.

Piginneqatigiiffiit allat aqutugalugit toqqaannangitsumik piginneqataasoqarsinnaavoq, piginneqataassutit 50 procentii sinnerlugit pigisaqartoqarpat. Toqqaannangitsumik oqartussaassuseqartoqartarpoq piginneqatigiiffiit allat aqutugalugit piginneqataasut taasisinnaasut 50 procentii sinnerlugit piginnittoqarneragut.

Taasisinnaasut amerlassusaasa naatsorsorneranni aktienik qularnaveeqqutitut pissarsinikkut taasisinnaalersimasut ilanngunneqarneq ajorput. Selskabip, selskabip allap akiligassaqalersimasup aktietaanik qularnaveeqqutitut pissarsiani taasinernik pisisimappat suliffeqarfissuarnut attuumassuteqanngitsutut isigineqassaaq, akiligassalillu qularnaveeqqusiinermigut taasinermik pisisimappat suliffeqarfissuarnut attuumassuteqartinneqarneq ajorportaaq.

Peqatigiiffik inummit imaluunniit inummit inatsisitigut pisinnaatitaasumit pisussaataasumilluunniit pigineqarsinnaanngilaq, inuulli ataasiakkaat inuillu inatsisitigut pisinnaatitaasut pisussaataasullu peqatigiiffiup malittarisassai aqutugalugit, ilaasortalluunniit isumaqatigiissuteqarfiginerisigut peqatigiiffimmik ingerlatsisuusinnaapput.

Aalajangersagaq inunnut inatsisitigut pisinnaatitaasunut pisussaataasunullu namminersortunut kalaallillu nunaanni malittarisassat malillugit akileraaruserneqarsinnaasunut tamanut atuuppoq.

### Imm. 3-mut

Akileraaruseriffiup imm. 1, nr. 1-imi allaqqasoq ukiunik tallimanik piffissaqartitsineq ukiunut pi-ngasunut sivitsorsinnaavaa, ukiuni tallimani piffissarititaasoq pilersaarutit pinngortitalluunniit suliat ajornarsisippagit.

Taamaalilluni ajornartoornerit pakkersimaarneqarsinnaapput, soorlu qillerinermi atortunik ajutoor-toqarpat, sulisussaaruttoqarpalluunniit, pinngortitap nukkiisa ajornartorsiortitsinera soorlu Tunup avannaarsuani ukiut tallimat iluini pilersaarutit kipusortinneqarsinnaasut.

Ukiuni tallimani piffissarititaasup ingerlanerani sivitsuisoqarsinnaavoq, aammattaaq akuersissutinik tunisinissanik isumaqatigiittoqartillugu. Ukiunili tallimani piffissarititaasup qaangiutereernerani sivitsuisoqarsinnaanngilaq. Akileraaruseriffiup piffissamik sivitsuilluni aalajangiinera malittarisassat matumunnga atuuttut malillugit Akileraarusiinernik aalajangiisartunut suliassanngortinneqarsinnaa-voq.

### Imm. 4-mut

Aatsitassanik misissueqqaarnissamut ujarlernissamulluunniit akuersissummik pisisup akiliisussan-ngornerata saniatigut allamut atugassanik pisippat, tunisisup malittarisassat allaqqasut malillugit akiligassaraluinut, akileraartarnermi malittarisassat nalinginnaasut malillugit akiliutit ilaat tamatu-munnga atasut akileraarusersorneqassapput. Apeqqutaatinneqanngilaq akiliineruneq aningaasanik, aktianik, akuersissutilluunniit ilaannik pisisoq Kalaallit Nunaanneersuuppat allamiuuppalluunniit.



Aalajangersagattaq atuutsinneqassaaq imm. 1, nr. 2 malillugu ingerlatsinermi aningaasartuutunik ilanngaataasussat uniorlugit aningaasanik atuisoqarneragut. Pisisoq taamatut aningaasartuuteqarpat, aningaasartuutit taakku tunisisup aningaasarsiaanut akileraaruteqaataasussanut ilanngunneqassap-put, pisisulli akileraartarnermi malittarissat periarfissiinera tunngavigalugu ilanngaatigisinnaavai nalikilliliinnikkulluunniit ilanngaatigisinnaallugit. Taamaattoqartillugu tunisisup tunisinermi ani-ngaasarsiai, pisisullu pisinermi aningaasartuutai tunisisup pisisullu akuersissummik pigisaqarneran-nut naapertuutissapput.

#### Imm. 5-imut

Isumaqatigiissuteqareernerup kingorna imm. 1, nr. 1, imaluunniit imm. 3 malillugu ukiuni arfineq pingasuni ingerlasussaaq, ukiuni tallimani piffissarititaasup qaangiutereernerani pisisoq aatsitassanik misissueqqaarnermik ujarlernermillu ingerlataqaruni, aningaasartuutaasut nalingisut tunisisup ukiu-mi aningaasarsiorfiusumi aningaasarsiat akileraaruteqaataasussanik naatsorsuinermi ilanngutissavai, paasinarsippat piffissarititaasup qaangiutereerneragut akilerniarai. Akiliinerli kingusinnerpaamik piffissarititaasup qaangiunnerani ukiumi aningaasarsiorfiusumi aningaasarsiat akileraaruteqaataa-sussanik naatsorsuinermi ilanngutissavai.

Aalajangersakkami anguniarneqarpoq piffissarititaasoq eqqorlugu siunertamik eqquutitsinngitsoor-nikkut akileraartussaataitanermi malittarisassat unioqqutinneqannginnissaat.

#### Nr. 6-imut

Aalajangersakkap kingunerissavaa, inuit, § 1, imm. 1, nr. 1 naapertorlugu tamakkiisumik akileraar-tussaataasut imaluunniit § 2, imm. 1-imiit 6-imut imaluunniit imm. 5, oqaaseqatigiit aappaanni taaneqartunik killilimmik akileraartussaataitasut inummut ilanngaateqartinneqarsinnaalernerat.

Inuit, § 2, imm. 1, nr. 3 aamma 4 naapertorlugu killilimmik akileraartussaataitasut Kalaallit Nunaata qimannissaa tikillugu, ullormi atorfiniffimminit inummut ilanngaateqartinneqassapput.

Inuit, § 2, imm. 1, nr. 5 naapertorlugu killilimmik akileraartussaataitasut piffissami ilinniartuunersi-uteqarnermini il.il. inummut ilanngaateqartinneqassapput.

Inuit, § 2, imm. 1, nr. 6 naapertorlugu killilimmik akileraartussaataitasut Kalaallit Nunaanni inuus-sutissarsiumminnik ingerlatsisillutik inummut ilanngaateqartinneqassapput.

Inuit, § 2, imm. 5, oqaaseqatigiit aappaat naapertorlugu killilimmik akileraartussaataitasut akileraar-tussaaffiup ingerlanerani inummut ilanngaateqartinneqassapput.

Qulaani taaneqartut killilimmik akileraartussaataitasut ilanngaammik aalajangersimasumik ilan-ngaateqartinneqassanngillat, aammalu aningaasarsiat B-t akileraaruteqaataasussaannngitsunik ilan-ngaateqartussaataitaanatik.

#### Nr. 7-imut

§ 68, imm. 2, nr. 1-imiit 6-imut aalajangersagassatut siunnersuutit aalajangersakkat atuutereersut tunngavimmikkut ingerlateqqiinnarneqarput.

Siunnersuutigineqarporli imm. 2 atuaruminarsarlugu suliarineqassasoq.

Siunnersuutigineqarportaaq nr. 3-mi aamma 6-imi aalajangersakkanut ilanngunneqassasoq misissu-eqqaarnerit, tassami suliffeqarfiit taakku misissueqqaarnerup ingerlanerani killilimmik akileraartus-saatitaammata.

Akileraartussaataitaanerup atuutilereernerani misissueqqaarnerit ujarlernerillu nalunaarutigineqar-pata, ukiumi akuersissumik isertitaqarfiusumi aallartittumik Akileraaruseriffik akileraarfiussaaq.

§ 68, imm. 2, nr. 7-imut

Siunnersuutigineqarpoq Akileraaruseriffik kommunitut akileraarfittut isigineqassasoq, sulisoq piler-saarusiukkanik, sanaartornernik, ikkussuinernillu illoqarfiit nunaqarfiillu avataanni suliaqarpat, qaammatillu siulii arfinillit Kalaallit Nunaanni kommunit arlaannut akileraartussaasimanngippat.

Aalajangersagaq inunnut namminersorlutik ingerlatsisunut atuutinngilaq. Nalilersuineqassaaq ator-fininnissamut isumaqatigiissuteqartoqarsimanersoq. Pingaartinneqassaaq sulisitsisup peqqusinera-tigut akiligaanik, ajutoornissamut sillimmaseqqasumi sulinersoq, isumaqatigiissuteqarsimanersorlu. Sulisup suliamini aningaasatigut ajunaarutaasinnaasut akiligassarinnigilai, isumaqatigiissuteqarsi-massallunilu sulinermigut akunnermut, sapaatip akunneranut qaammammulluunniit akissarsiaqar-nersoq.

Aalajangersagaq atuutsinneqarpoq sulisunut pilersaarusiukkanik, sanaartukkanik, ikkussuinernullu suliaqartunut. Pilersaarusiornerni pineqarput ataqatigiissaarinerit, titartakkat naatsorsuinerillu sa-naartornerni ator-neqartussat. Sanaartornerni pineqarput sanaartornerni ikkussugassat aningaasatigut teknikkikkullu nammineq napatittoq. Ikkussuinerni pineqarput teknikkikkut atortut katiternerit, sanaartukkat, atortut elektroniskiusut il.il.

Aalajangersakkami taamaallaat pineqarput assessorlutik suliallit, teknikerit, ingeniørit, igasut, igaf-fimmi sulisut, sulisartut, peqqinnissaqarfinni sulisut assigisaallu. Sulisut assersuutigalugu allaffim-miut, sanaartorfimmut/-miillu angallassisut assigisaallu aalajangersakkami ilaatinneqanngillat.

Suliat illoqarfiit nunaqarfiillu avataanni ingerlanneqassapput. Aalajangersakkami taamaallaat pine-qarput suliatik peqqutigalugit illoqarfiit nunaqarfiillu avataanni sulisut, najugaqartullu. Assersuuti-galugulu sanaartukkanik pilersaarusiortoq aalajangersakkami ilaatinneqarsinnaanngilaq, Nuummi suliffeqarlunilu najugaqarpat.

Aalajangersagaq illoqarfiit nunaqarfiillu pioreersut avammut sanaartorfigineqarneranni atuutinngi-laq.

Taamatuttaaqq mittarfinnik helikopterillu mittarfiinik, illoqarfinnut nunaqarfinnullu angallanniarnar-mi pitsannorsaanerit, aalajangersakkami ilaatinneqarsinnaanngillat. Illuatungaagulli aatsitassarsi-orfinnut assigisaannullu angallannerni pitsannorsaanerit aalajangersakkami ilaatinneqarput.

Illoqarfinni nunaqarfinnilu pioreersuni umiarsualivinnik allilerinerit nutaanillu umiarsualivilornerit aalajangersakkami ilaatinneqanngillat, aatsitassarsiorfinnulli suliffissuaqarfinnullu illoqarfiit nuna-qarfiillu pioreersut avataaniittunut atassuteqaataasussamik nutaanik umiarsualivilornerit aalajanger-sakkami ilaapput.

Aammattaqq erngup nukinganik illoqarfinnut nunaqarfinnullu pioreersunut pilersuisussanik sanaar-tornerit aalajangersakkami ilaannngillat, illuatungaagulli aatsitassarsiorfinnut

suliffissuaqarfinnullu illoqarfiit nunaqarfiillu avataaniittunut erngup nukinganik innaallagissiorfiliornert aalajangersak-kami ilaapput.

Illoqarfiit nunaqarfiillu pioreersut akornanni aqqusinniornerit aalajangersakkami pineqartussaangillat. Matumani aamma suliffissuaqarfiit, illoqarfiit nunaqarfiillu pioreersut akornanni aqqusinni-ornerit aalajangersakkami ilaatinneqangillat.

§ 68, imm. 2, nr. 7-imi siunnersuutigineqarpoq sanaartornerup nalaani taamaallaat atuutsinneqassa-soq. Malittarisassa imm. 1 imaluunniit imm. 2 nr. 8 malillugu suliap naammassinerani sulisut aki-leraarfiusussamik kommunilernerneqassapput. Suliap naammassineratut isigineqassapput sanaartugaq atulerpat, tunisassiorneq assigisaallu aallartinneri. Sanaartukkat naammassereerneranni misileraa-nerit, piffissaq misiliiffik assigisaallu sanaartornertut isigineqassapput. Alumiiniumik aatsisivilior-neq naammassisutut isigineqassaaq nalinginnaasumik tunisassiulerpat. Aatsitsivissamut innaallagis-siorfiliorneq naammassisutut isigineqassaaq aalajangersimasumik innaallagissamik pilersuilernerat-tigut.

Aalajangersagaq taamaallaat atuutsinneqassaaq sulisoq qaammatit siulii arfinillit kommunimut aalajangersimasumut akileraartarsimangippat. Piffissaq suliffigisaq naatsorsorneqassaaq qaam-matisiutit malillugit qaammatikkaartumik, tikiffik aallarfillu ilanngullugit naatsorsuutigineqassap-put. Matuma kingorna qaammammi ullut qasserpiaaneri pingaarutaarutissapput. Sulisoq kommune akileraarfini 5. januar qimareerlugu 4. juuli ukioq taanna suliffeqarfinnut taaneqartut ilaanni suliler-pat Kalaallit Nunaanni akileraartussaataitanera kipineqarsimasutut isigineqassaaq, taamaalillunis-saaq kommune akileraarfigisani qaammatini arfinilinni qimassimasimassallugu.

#### § 68, imm. 2, nr. 8-mut

Siunnersuutigineqarpoq suliffeqarfimmi akileraartussaataitaasumi, Kalaallit Nunaanni aatsitassanik misissueqqaarnissamik, ujarlernerimik akuersissutilimmi, § 32, imm. 3 malillugu Kalaallit Nunaan-ni aatsitassat pillugu inatsit malillugu sulisoq qaammatilluni siulii arfinillit Kalaallit Nunaanniissi-manngitsoq, taamaalilluni kommunimut akileraartarsimangitsoq Akileraaruseriffimmut akileraar-tassasoq.

§ 68, imm. 2, nr. 7-imi aalajangersakkat malillugit nalilernerneqassaaq atorfinitsitsisoqarsimanersoq.

Suliffeqarfinni taaneqartuni sulisut kisimik aalajangersakkami ilaatinneqarput. Suliffeqarfinnut pi-lersuisunut mikinerni sulisut aalajangersakkami ilaangillat, naak aalajangersagaq malillugu sulif-feqarfinnut aalajangersakkamut attuumassuteqartunut sullissigaluarluniluunniit.

Aalajangersagaq taamaallaat atuutsinneqassaaq sulisoq qaammatit siulii arfinillit kommunimut aala-jangersimasumut akileraartarsimangippat. Piffissaq suliffigisaq naatsorsorneqassaaq qaammatisiu-tit malillugit qaammatikkaartumik, tikiffik aallarfillu ilanngullugit naatsorsuutigineqassapput. Ma-tuma kingorna qaammammi ullut qasserpiaaneri pingaarutaarutissapput. Sulisoq kommune akile-raarfini 5. januar qimareerlugu 4. juuli ukioq taanna suliffeqarfinnut taaneqartut ilaanni sulilerpat Kalaallit Nunaanni akileraartussaataitanera kipineqarsimasutut isigineqassaaq, taamaalillunissaq kommune akileraarfigisani qaammatini arfinilinni qimassimasimassallugu.

Nr. 8-mut

#### § 72 a-mut

Siunnersuutigineqarpoq sulisoq illoqarfiit nunaqarfiillu avataanni pilersarusiornermi, sanaartorner-mi, ikkussuinermilu suliaqartoq, kommunimullu qaammatit siulii arfinillit akileraartarsimangitsoq tamakkiisumik 35 procentinik akileraaruteqartinneqartarnissaa.

Inuk tamakkiisumik imaluunniit killilimmik Kalaallit Nunaannut akileraartartuunera apeqqutaatin-nagu tamakkiisumik akileraaruteqartitsinermit ilaatinneqassaaq.

Nalilersorneqassaaq sulisoq atorfinitsitaasimanersoq. Atorfinitsitaanera tunngavigalugu nalilersor-neqassaaq sulisoq sulisitsisup peqquseragut, akiligaatigut, sillimmasersimaneragut, isumaqatigiissu-teqarnikkullu atorfeqartitaanersoq. Sulisoq suliani akilersussanngilaa, aningaasatigut annaasaqaati-gissanagu, ataavartumik sulisitsisunilu isumaqatigiissuteqassapput, akunnermut, sapaatip akunnera-nut qaammammulluunniit akissarsisassalluni.

Pilersarusiornermi, sanaartornermi ikkussuinermilu sulisut kisimik aalajangersakkami pineqarput. Pilersarusiornermi pineqarput aaqqissuinerit, titartaanerit naatsorsuinerillu sanaartornermi atorner-qartussat. Sanaartornermik paasineqassapput sanaartukkanik ikkussuinerit nammineq aningaasatigut teknikkikkullu napatittut. Ikkussuinerit paasineqassapput katiterinerit, teknikkikkut atortut, sanaar-tukkat, atortullu elektroniskiusut ikkussorneri il.il.

Sulisut taaneqartuni suliallit kisimik aalajangersakkani ilaatinneqarput, soorlu assassorlutik suliallit, teknikerit, ingeniørit, igasut, igaffimmi sulisut, sulisartut, peqqinnissaqarfimmi sulisut assigisaallu. Assersuutigalugu allaffissorlutik sulisut, sanaartorfimmu/-miillu angallassisut assigisaallu aalaja-ngersakkami ilaangillat.

§ 68, imm. 2, nr. 7 naapertorlugu suliat illoqarfiit nunaqarfiillu avataanni ingerlanneqassapput. Imm. 6-imi killiliinerit suuneri takuneqarsinnaapput. § 68, imm. 2, nr. 7-imi siunertarineqarpoq aalajangersakkat taakku marluk ataqatigiissarnissaat. Ataqatigiissinnaanerit assersuutaavoq piu-masaqaataammat § 68, imm. 2, nr. 7 malillugu sanaartorneq illoqarfiit nunaqarfiillu avataanni sa-naartornerit ingerlanneqarnissaat, tamakkiisumillu akileraaruteqartitsinissamut § 72 a innersuussuti-gineqarluni.

Aalajangersagaq taamaallaat sulisoq qaammatit siulii arfinillit Kalaallit Nunaanni kommunit arlaan-nut akileraartarsimangippat. Naatsorsuineq qaammatikkaartumik ingerlanneqassaaq, tikiqqeq aal-larnerlu ilanngullugit. Tamatuma kingorna qaammatip ullui pingaarutaarutissapput. Sulisoq Kalaal-lit Nunaanni kommunit ilaannut akileraartartoq 5. januar aallaruni aalajangersagarlu malillugu sulif-feqarfimmi 4. juuli sulileruni Kalaallit Nunaanni, taamaalilluni qaammatini arfinilinni akileraarsi-mangitsutut naatsorsuunneqassaaq.

Isumaqatigiissuteqartoqarsimaneq naapertorlugu aningaasarsianit A-nit B-nillu tamakkiisumik aki-leraaruteqartitsisoqassaaq, taamaattorli soraarnerussutisiatigut inuunermullu sillimmasiissutitigut aaqqissuussinermit akilersuutit aningaasarsianit akileraarutit pillugit inatsimmi § 39-mi, § 40-mi imaluunniit § 43-mi aalajangersakkani pineqartut ilaatinneqangillat. Aningaasarsiat akileraartar-nermi malittarisassat nalinginnaasut malillugit naatsorsorneqassapput.

Akileraarutissat naatsorsorneqalinnginneranni aningaasarsianit ilanngaateqartitsisoqarsinnaanngi-laq, soorluttaaq ukiuni siuliini aningaasarsiat amigartoorutinik inerineqartut ilanngaataasinnaan-ngitsut, aammattaaq § 4 d, imm. 2-mi aamma § 4 e-mi aalajangersakkat atornerqarsinnaanngitsut.

Atorfinitsitaanermi aningaasarsiat kisimik akileraartussaanermi naatsorsuiner  
atorneqassapput. Inummut ilanngaait, aningaasartuutit ilanngaatineqarsinnaasut, matumani  
aamma ilanngaat aala-jangersimasoq ilanngaatillu allat akileraarutissat naatsorsulinnginnerini  
ilanngaatineqarsinnaan-ngillat. Taamatutaaq aapparisaq akileraartusstaatitaasup  
amigartoorutai, inummut ilanngaat atun-ngitsuugaq imaluunniit aningaasarsiat B-t  
akileraaruteqaataasussaannngitsut atunngitsuukkat ilan-ngaatineqarsinnaassanngillat.

Atorfeqartitaanermi aningaasarsiat piniarnerannut, isumannaalliniarnerannut  
allanngutsaaliorniar-neranullu akissaajaataasimasut akileraartusstaatitap  
aningaasarsiarisinnaasaanit aalanit ilanngaati-gineqarsinnaanngillat. Assersuutigalugu sulisoq  
kattuffimmut, sulisup atorfeqartitaanerani soquti-gisaanut atatillugu sullissisumut  
ilaasortaaguni, sulisup kattuffimminut akiliutini aningaasarsiarisin-naasaminut allanit  
ilanngaatigisinnaasanngilai.

Aningaasarsianit akileraartusstaatitaaneq naammassineqartutut isigineqassaaq atorfeqarnerup  
nalaani aningaasarsiat akileraarusernerisigut akiliisoqarpat. Sulisoq taamaallaat  
tamakkiisumik akileraarute-qartusstaatitaaguni nammineerluni nalunaarsuiffimmik  
Akileraaruseriffimmut tunniussisussanngilaq, soorluttaaq Akileraaruseriffik  
pisussaaffiligaanngitsoq inaarummik naatsorsuummik il.il. sulisumut nassiusaqaarnissamut.  
Sulisup nunamini akileraaruserisunut atugassaminik tamakkiisumik akileraa-  
ruteqartarnerminut uppernarsaateqarniaruni, tamanna Akileraaruseriffiup  
uppernarsaasiorsinnaavaa, aammalu inaarummik naatsorsuummik tunisinnaallugu.

Sulisop atorfimmi avataatigut suliaqarnermigut A-nik aningaasarsiaqarsimaguni  
tamakkiisumik aki-leraaruteqartussaanermi aaqqissuussinermi ilanngunneqarsinnaanngilaq,  
kisiannili aningaasarsianit akileraarutit pillugit inatsimmi malittarisassat nalinginnaasut  
malillugit aningaasarsiani akileraarute-qaataasussat naatsorsussallugit. Killiliineq tamanna  
illoqarfiit nunaqarfiillu pioreersut avataanni sa-naartugassanik taamaallaat suliaqartunut  
tamakkiisumik akileraaruteqartitsineq atorneqartussatut isiginiarneqassaaq.

Sulisop tamakkiisumik akileraaruteqartartilluni suliffimmi avataagut aningaasarsiaqaruni,  
malittari-sassat nalinginnaasut malillugit akileraassaaq. ”Aningaasarsiatut allatut”  
paasineqassapput maani nunami, nunaniluunniit allani sulinermigut aningaasarsiai, aamma  
nunami allami akissarsiat, inun-nilluunniit isumagineqarnermit aningaasarsiat.  
aningaasarsiatut A-tut isigineqassapputaaq sulisop tamakkiisumik  
akileraaruteqartalinnginnermini nunami maani sulinermigut aningaasarsiai, kiisalu  
tamakkiisumik akileraaruteqartusstaatitaaffiunngitsumi suliffeqalersimappat. Ukiumi  
aningaasarsi-orfiusumi sulisop tamakkiisumik akileraaruteqartusstaatitaasutut  
inissisimajunnaarpat akileraartar-nikkut aallartutut tikittutulluunniit inummut ilanngaammik  
il.il. ilanngaateqartinneqassaaq.

Siunnersuutigineqarportaaq aappariit akunnerminni amigartoorutit nuunneqartarnerat,  
inummut ilanngaait atunngitsuukkat aamma aningaasarsiat B-t  
akileraaruteqaataasussaannngitsut atorneqas-sanngitsut, sulisup tamakkiisumik  
akileraaruteqartusstaatitaasutut aningaasarsiai akileraaruteqaa-taasussat tamarmiusut 50  
procentii sinnerlugilluunniit akileraarusersorneqarsimappata.

Taamatutaaq tamakkiisumik akileraaruteqartartup aapparisaaminut nuutsinnaanngilaq,  
soorluttaaq aapparisaq tamakkiisumik akileraaruteqartartup aningaasarsiaanut aningaasarsianit  
akileraarutit pillugit inatsimmi malittarisassat nalinginnaasut malillugit  
akileraarusersorneqartunik ingerlatitseq-qissinnaassanngitsoq.

## § 72 b-mut

Siunnersuutigineqarpoq sulisoq atorfinitsinneqarnermini aalajangersimasumik suliartaqtaalluni, aatsitassanik piianissamut ingerlatanullu Inatsisartut inatsisaat naapertorlugu aatsitassanik misis-sueqqaarnermik, ujarlerneramik piiaanermillu suliartaqtoq, nunamilu maani kommunit arlaannut qaammatit arfinillit siuliini akileraartarsimannigitoq tamakkiisumik 35 procentinik akileraarute-qartinneqartalissasoq.

Aalajangersakkami inuit tamakkiisumik killilimmillu akileraartartussaataitaasut pineqarput

Sulisoq aalajangersakkamut attuumassuteqassappat piumasarineqarpoq piffissap suliffigisap affaa sinnerlugu aatsitassanik misissueqqaarnermik, ujarlerneramik piiaanermillu suliartaqsimanissaa. Apeqqutaanngilaq sulisoq aatsitassanik misissueqqaarnermik, ujarlerneramik piiaanermillu akuersis-sutilimmi, suliffeqarfimmiluunniit akuersissutilimmut pilersuisumi sulinersoq.

Pisortatut sulisutulluunniit aatsitassanik misissueqqaarnermi, ujarlernerami, piiaanermilu suliassat aalajangersimasut sulinerit sulinivittut isigineqassapput. Assersuutigalugu immap naqqa sajuppillat-sittarlugu angallammi inuttaasoq, angallatillu naalagaa piunasaqaatinik eqqortitsissapput, soorluli qaartiterisoq piiaaffimmiluunniit pisortaasoq piunasaqaatinik eqqortitsissasut.

Illuatungaatigulli pisortatut, sulisulluunniit pisortaattut qulliunerusutut inissisimasut, aamma sulif-feqarfimmik ikorfartuisut aalajangersakkami ilaatinneqarsinnaanngillat.

Aalajangersakkallu avataa-niipput soorlu aatsitassanik misissueqqaarnermi, ujarlernerami, piiaanerni pilersaarusiortut, aningaasa-qarnikkut atorfiit soorlu suliffeqarfiup aningaasaqarnerinik nakkutiginnittut, naatsorsuuserisut il.il., inuttaqarnermi isumaginnittut, sulisussarsiortartut, kiffartuussisut, soorlu inatsisilerituut kukkunerisi-uisullu, aningaasaliisut assigisaallu, atortussanik soorlu sanaartornermi atugassanik pilersuisut, neri-sassanik pilersuisut ilaallu ilanngullugit. Tassunga atatillugu ilaatinneqarput qillerutinik umiarsuar-nillu atukkiisut il.il., aatsitassarsiornermi misissueqqaarnermi, ujarlernerami piiaanermilu aalajanger-simannigitsunik suliallit.

Aalajangersagaq siunnersuummut § 72 a-mut attuumassuteqarpoq, taamaammat aalajangersagaq una pillugu oqaaseqaatinut innersuussineqarpoq.

Nr. 9-mut

Inatsisassatut siunnersuummi nr. 8-p qulaani taaneqartup kingunerisaanik allannguineruvoq.

Nr. 10-mut

Inatsisassatut siunnersuummi nr. 8-p qulaani taaneqartup kingunerisaanik allannguineruvoq.

Nr. 11-mut

Inatsisassatut siunnersuummi nr. 8-p qulaani taaneqartup kingunerisaanik allannguineruvoq.

## **§ 2-mut**

Siunnersuutigineqarpoq Inatsisartut inatsisissaat 1. december 2010-mi atuutilissasoq, inatsisissatullu siunnersuummi nr. 2-miit 6-imut aalajangersakkat ukioq aningaasarsiorfik 2010 aallarnerfigalugu sunniuteqalissasut, kiisalu inatsisissatut siunnersuummi nr. 7-imiit 11-mut aalajangersakkat ukioq aningaasarsiorfik 2011 aallarnerfigalugu sunniuteqalissasut.